

ርኢሰ ኢሰያስ አፈወርቂ፡ ምስል ርኢሰ ቻይና ሺ ጂንፒንግ ወርኢሰ ውዘረኢ ሀድገ

ርኢሰ ኢሰያስ አፈወርቂ ወርኢሰ ጅምሁርየት ቻይና ሺ ጂንፒንግ፡ ማሌ ለሀ እት ዲሞክራሲ ሕዝብ እንዲ ትራክብወ፡ እት አደቀቦት ፅላቃት ወናይ ሕብር አሀምየት ለቡ ቅደይ ሀድግ ወደው።

ርኢሰ ኢሰያስ፡ ዐለም እት ምህም መርሐለት ተቅዩር እተ ሀሌት እቲ ወክድ፡ ገባይል ዐለም ዝያድ ለገአ ልግበኢ ወቅት እግል ሰላም ወመሰከብት እብ አኖካይ ወሰእየት ለአትቃሙተ ክምስል ሀለው እት ሸርሕ፡ ቻይና እት ክሉ መጃላት ሰጅልቲ ለሀሌት ተጠወር ዋሰዕ ሰበት ቲ፡ እት ዐለም ተረት ዛይደት እግል ተአግዳ፡ መቅደረት ዐባይ ክም ሀሌት ወደሐ።

ርኢሰ ሺ እብ ተረቲ፡ ርኢሰ ኢሰያስ እት ዓይ ወዕለ ሸራክት ቻይና ወአፍሪቀ እግል ልሻርክ ለትቀደመት እቲ ዐዘመት ምን ትክብተ ሐምዲሁ ሐቆለ ቀደመ፡ ቻይና ምስል ኤራትሮፕ ለብ ትርድት ፅላቃት እግል ተአደቅብ ጅሀድ ክም ትወዳ አክደ።

እተ ሀድግ እብ ጀሀት ኤራትሮፕ ወዘር ካርጅየት ዐ-ሰማን ሳልሕ ወሰፊር ኤራትሮፕ እት ጅምሁርየት ቻይና አሰይድ ጸጋይ ተሰፋጽዮን፡ እብ ጀሀት ቻይና ሀይ ወዘር ካርጅየት ዋንግ ዩ፡ ወዘር ትጃረት ዌንታው፡ ወዘር ዐማር ወጠን ገፍንግ ሻንጂ፡ ወዘር ማልየት ላን ፎን፡

ክምስልሁ መ ሰፊር ጅምሁርየት ቻይና እት ደውለት ኤራትሮፕ ለ ገርንያንግ ሓድራም ዐለው።



እሊ ክእን ዲብ እንቲ ርኢሰ ኢሰያስ አፍወርቂ፡ ዮም 3 ሰብተምባር ቀደም አድሀር፡ ምስል ርኢሰ ወዘራኢ ጅምሁርየት ቻይና ለ ሺ ጂንፒንግ ሀድግ ወደ።

እተ ዲብ ዲሞክራሲ ለገአ ሀድግ፡ ርኢሰ ኢሰያስ ቻይና እብ ትተበተ ሰያሰት ለሰጀለቲ ተጠወር እት ክሉ መጃላት ለሰአትዐጅብ ክምቲ እት ሸርሕ፡ እብ እግል ራክብት ሀሌት መቅደረት፡ እት ሓድረት

ክልኢተን ለድወል፡ ክምስልሁ መ እት ድዋራትን ወቃረት አፍሪቀ ተረተ እግል ተአግዳ ለቡተ ንየት ወቅል ክምተ ሸርሐ።

ርኢሰ ውዘረኢ ለ ሺ ጂንፒንግ እብ ተረቲ፡ ፅላቃት ኤራትሮፕ ወቻይና እተ ሐልፈ ወቅት ተጠወር ሻፍግ ክም አርኤት፡ ምን እሊ ለሀሌተ ደረጀት ዝያድ እግል ትተውቀል ክም ሸቁ ሀይ አክደ።

እተ ሀድግ፡ እብ ጀሀት ኤራትሮፕ ወዘር ካርጅየት አሰይድ ዐ-ሰማን ሳልሕ፡ ሰፊር ደውለት ኤራትሮፕ እት ጅምሁርየት ቻይና አሰይድ ጸጋይ ተሰፋጽዮን፡ እብ ጀሀት



ሓለት ሰያሰት ዐለም ዶር ዐቢ እግል ተአግዳ ለሀሌት መቅደረት ዋሰዕት ሰበት ቲ፡ እት ፅላቃት

ቻይና ሀይ ናይብ ወዘር ካርጅየት ለብእቶም ውቁላም ሰብ-ሰልጠት ሓድራም ዐለው።

ርኢሰ ኢሰያስ አፈወርቂ፡ ምን ዮም 4 አሰክ 6 ሰብተምባር ቻይና ለትተሐደሩ 9ይ ወዕለ ሸራክት

ቻይና ወአፍሪቀ እግል ልሻርክ፡ ዮም 1 ሰብተምባር ቲ ቤይጂን ለአተ።

ውዛረት ዐድል፡ እት ዐማር ወጂኡ-ሰያሰት ቀር አፍሪቀ ለረከዘ ሀድግ እግል ቲዳ ቲ

ውዛረት ዐድል፡ እት ዐድል፡ ዐማር ወጂኡሰያሰት ቀር-አፍሪቀ ለረከዘ ሀድግ፡ ምን ዮም 4 አሰክ 6 ሰብተምባር እት ሆቴል አሰመራ-ፓላስ እግል ቲዳ ቲ።

ውዘረት ፎዝዮ ሃሸም እግል በርናምጅ፡ ሀደፋ ወጽቦጡ እብ ክሰስ እግል ተለፍዝዮን ኤራትሮፕ እት ሀብተ ሐብራ፡ ለበርናምጅ አተላላይ ናይለ እት ሐልፈ ወርሕ አፕሪል ለትሰርገለ ወዕለ ክምቲ እት ተሐብር፡ እብ ክሰስ ጂኡሰያሰት ቀር-አፍሪቀ ፈሀም ዋሰዕ ለሰም መኤምረት ተጃርብ እግል መትባዳል ወፍክር እግል ልትረከብ ለአመመ ክምቲ ሸርሐት።

መሻርክት ሀይ፡ ኤራትሮፕን ወውላድ ካርጅ እት ገብኤ፡ ምስል መውዶ ፅላቃት ለሰም ሰብ ምህነት ቃን፡ ዕሉም በሸር፡ ዕሉም መጅተመዕ፡ ኬትቡት፡ ባሕሲን ታሪክ ወዐማር፡ ክምስልሁ መ



መኤምረት እቅትሳድ ክምቶም ሐበረት።

እትሊ እግል 3 አምዕል ለሰአተላሌ ሀድግ፡ “ኤራትሮፕ ምን አረይ እት አግደ መሻርካይት

ጅኡሰያሰት ቀር አፍሪቀ”፡ ነቃስ ዐቢ እት እድንያይ ፅላቃት ወሸንርቡ እት መሸጠቅት”፡ ታሪክ ጂኡሰያሰት ዳይናሚክ እት ቀር-አፍሪቀ”፡ ብናእ ናይ ሕብር ፈሀም እት ናይ ሕብር ዐማር ባቀት፡ ጌማም በርናምጅ ውሕደት እት አፍሪቀ ውብዕድ አርእስ ለረከዘ ክቲብ እግል ልትቀደም ቲ።

ውዛረት ዐድል ቀደም እላመ፡ “ቃን ውብናእ ወጠን” ቃን ወዐማር” ክምስልሁ መ ሰዋልፍ ዐድል እብ ልብል ሰቅራታት ወዕላታት ሰርግልት ክምስል ዐለት ለልትዘከር ቲ።

ፍገራት ወጠንያይ እምተሐን 8ይ ፈሰል ተሐበረት

ዲብ ወጠንያይ እምተሐን 8ይ ፈሰል ናይ ሰነድ ድራሰት 2023/2024 ምንላ ሻረከው 65,591 ደረሳይ፡ ለ50 ምእታይት ክም ሐልፈው፡ ዲብ ውዛረት ተዕሊም መስኡል ውሕደት ወጠንያይ እምተሐን አሰይድ ሀብቲ አሰፊህ እግል ኤሪት ሐበረ።

ምንላ ሐልፈው ለ 46.2 ምእታይት አዋልድ አንሳት ክምተን፡ 55.8 ምእታይት አዋልድ አንሳት ለልትረከብ እቶም 760 ደረሳይ ሀይ 90 ወምት ወለዐል ንቃዋ ክም አምጽአው ለመስኡል አብረሀ።

እብ ተውሳክ፡ ዲብላ ወጠንያይ እምተሐን ምንላ ሻረከው 22 ጸማይም ለ 19 በሀለት 86.4 ምእታይት፡ ዲብ ከደማት ሰጅን ወተጅዲድ ሰምበል ምንላ አምተሐከው 23 ሀይ 56.5 ምእታይት ክም ሐልፈው መ ሐበረ።

እብ ደረጀት አቃሊም ሀይ፡ አቅሊም ዐንሰበ 33.7 ምእታይት፡ አቅሊም ባብለት 50.6 ምእታይት፡ አቅሊም ጋሽ-በርከ 40.8፡ ምግብ 66.3፡ ቅብለት በሐር ቀየሕ 38.7 ምእታይት፡ አቅሊም ባብለት በሐር ቀየሕ ሀይ 47.2 ምእታይት ክም ሐልፈው አክበረ።

እምበል እሊ፡ ዐደድ ሐሊፍ ዲብ አንፋር ቅዋት ድፋዕ 53.5 ምእታይት፡ ዲብ መዳርስ ካርጅ ሀይ ጃልያት ኤራትሮፕን ረያድ ወጀደ 83.9 ምእታይት፡ ጃልያት ኤራትሮፕን ዲብ ክሰስ ሀይ ምእት ምእታይት ክምቲ ሐበረ።

ወጠንያይ እምተሐን 8ይ ፈሰል፡ እት ክርስ ዐድ፡ ክምስልሁ መ ዲብ ጀደ ወረያድ - ሰዕ-ዲ ዐረብ ወዲብ ክሰስ - ሰ-ዳን ተሀየቡ።



ሐልሐል : ወዕለ ጌማም ተዐሊም ወሰታት 5 ሰነት



መክተብ ተዕሊም ዲብ ምደርየት ሐልሐል፡ ፍጻሌየት ቀራራት ወፊናታት ናይሉ ዲብ ሰነት 2017 ለገብአ ወዕለ ተዐሊም ለቀይም ምን ሰነት 2024 ኣስክ 2029 ዲብ ፈግረ ስታት ሸቅል ለሀድገ እጅጉም ዲብ የም 26 ኣገሰት ገብአ።

መስኡል ናይሉ መክተብ እስታዝ ዑሰማን መሐመድ ኣድም፡ ሀደፍሉ ወዕለ፡ መሻረከት ደረሰ ዲብ ዐግሎ ተዐሊም እግል ትዕቤ፡ ኣትካራም ደረሰ ዲብ ትደሀረት ደረጃቱ እግል ልትከሬ፡ በቃዕት ተዐሊም እግል ትሰኔ፡ ዶር ሙጅተማዕ ዲብ ተዕሊም እግል ልዕቤ፡ መሻረከት ወኣተላላይ ኣዋልድ ኣንሳት ዲብ ዐግሎ ተዐሊም እግል ልትኣከድ ወብዕድ ክም ዐለ እንዴ ሐበረ፡ ፈድል መዓወነት ሙጅተማዕ ወክለን ጅሃት ለለኣትናይት ሄራር ክም ትሰጀለ ሐበረ።

እብ ኣሳስ ቀራራት ወፊናታት ወዕለ፡ መሻረከት ዲብ ክሉ ደረጃት ተዐሊም፡ እብ 70

ምእታይት፡ ብዝሒ መዳርሰ ህዩ እብ 81 ምእታይት ክም ዐቤ ሸርሐ። እተ ምዳርየት ቅዌት ለኢኣብደው ጅሃት ሙጅተማዕ ሕሰር ፍንቱይ እንዴ ትህየበው፡ ልትከደም ክም ህለ እብ በራምጅ ኣብደዮት ቅዌት እንዴ ኣንበተዮ፡ ዲብ እምትሓን ሸሃደት ካልኣይት ደረጃት እንዴ ሸረከዩ ለሐልፊዩ ኣንሳትም ክም ህለዩ ሐበረ።

እስታዝ ዑሰማን ዲብ ደንጎቤ ሕዳን ሙደርሰን፡ መጋድዕ ኣክትብት፡ ዲብ መኣንብታይት ወምግባይት ደረጃት፡ ሕዳን ኣፍሱል ድራሰት፡ ወመሐገዝ ጽዋር ቴክኖሎጂ ዲብ መዳርሰ፡ ለትትሐዜ በቃዕት ምን ኣከደት መታክል ጋብእ ለህለ ክምቱ እንዴ ሐበረ፡ መዓወነት ለከሰሰን ጅሃት እግል ቲዚድ ትላከ።

መስኡሊን እዳራት ደዋይሕ እብ ጀህተም፡ ዲብ ሐልፊዩ 7 ሰነት ለዐለ ተሐድዮት ወለትርኣ ሄራር፡ እተክምሰልሁም ናይሉ መጽእ ወክድ በራምጅ ለከሰሰ

መብርሂ ሀበው። እት ፈርዕ ተዕሊም ኣቅሊም ዐንሰበ መስኡል ውሕደት ጠወሮት መቅደረት ኣዳም እስታዝ ዐብዱ እስማዒል ህዩ፡ ምን ናይሉ ሐልፊዩ ሰፍታት እበ ትካስኣ ተጃርብ፡ ዲብ መጽእ 5 ሰነት ለሕሰት ፍገራት እግል ትሰጀል ምሰል ሙጅተማዕ እት ትሳዴ እግል ልትከደም ኣትፋቀደ።

ሙዳር ምዳርየት ሐልሐል ግርማጽዮን ኣብርሃ እተ ቀደመዩ ከልመት፡ ሐቐለ ወዕለ እብ ሰብ ሪም ምድር ወመሓገዝ ኣፍሱል ምን ተዕሊም ራይማም ለዐለው ኣጀኒት ዲብ ዐግሎ ተዕሊም እግል ልትኣበር ክም ትቀደረ እንዴ ሸርሐ፡ ኣስክ እለ ተሐዲ ጋብእ ለህለ ኢመትከምካም ደገገት ሐል እግል ልትረከብ እሉ እብለ ትወቀለት ክም ልትከደም እቱ ሸርሐ።

እተ መናሰበት፡ እግል መስኡሊን እዳራት ወዲብ እምትሓን ሸሃደት ሰነት 2023/2024 ናይ ዲግሪ ወድፕሎም ንቃዋ ለኣምጻኣው ደረሰ ጀዋእዝ ተህየቤ።

እት ምዳርየት ሐልሐል፡ ዲብ ሰነት ድራሰት 2016/2017 ምን ረውዳት ኣስክ 2ይት ደረጃት 27 ለዐለ ብዝሒ መዳርሰ፡ እትሊ ወክድ እለ ዲብ 49 ውቁል ህለ።

ከልመት ጆ.ሸ.ዲ.ዐ እብ መናሰበት ሄለል ሰብተምበር 2024

ሄለል ሰብተምበር 1961፡ ሸዑብ ኤራትርዮ እግል ናይ ስደሰት ንዳሉ፡ እት ሐዳስ ምዕራፍ መዳፍዐት ለዐደ ዲቤ ወእግል ንዳል ሰለሕ ኣሌፍ እንዴ ቤለ ለኣንበተ እተ ካብረት ዕለት ተ።

እለ እንበተት ንዳል፡ ሸዑብ ሕርያን ብዕድ ሰበት ሐግለ ወትጀበረ ዲብ ለነሰኣዩ ቀራር ክቡድ ዐለት። ሰበቡ እት መቅደረት ናሱ እንዴ ኣምነ፡ ምሰለ እብ ዕጹፋት ለልትደቀቡ ኣባይሙ እግል ልትኣረብ ቀረርቱ ቀለል ጋር ሰበት ይዐለ፡ ለዶል ለህ በርጠጠዕ ለመሰለዮም፡ ወእግል ትትዐውት ለኢትቀድር ጀርቤ ብላሽ ለመሰለዮም ሐዳም ኢኮን።

ምናተ፡ ዶል ገዱ ቀደም እት ልሄርር ወዶልመ መሐለኪት እት ሳድፋ እት ወድቅ ወቀንጽ ወተጃርብ ዲብ ረክብ ኣክለ መጽኣተ፡ ተንዘም ብቐዕ ወሚርሐት ሰብል እንዴ ፈጥረ፡ ሐለቱ እግል ለኣደቅብ ኩለ ቅድረት ሸዐቡ ድድ ኣባይሙ እግል ለኣትባሰ ሰበት ቀድረ፡ ምርት ምና ሐድ መትጃግራይ ለቡ ንሱር ንዳላት ገባይል እግል ሕርየት ገብአ።

ለእግል 30 ሰነት ሄረረ መሪር ንዳል ሰለሕ፡ መሐለኪት ከርሰ ወለልኣተራቴ ክይናት ኣድሕድ ዲብ ሰዴ ዲቤ፡ ዐውል ቃለ ለኣድፍዔን ምንም ለዐሌ፡ እት ኣደቃብ ወጠንዶይት ጅንሰዮት፡ ወእት ኣተራድ መሕበራይት ምሰንዮት ሸዑብ፡ ሐዘት ዛይደት ኣግደ።

ዓዳት መትሰባል፡ እግል ትእመነ ለኢትቀድር ርሰዴ መሰለሐት ናሱ፡ መዕጸም ወካድም፡ ገሌ ምነ እት ንዳል ሰለሕ ሸዑብ ኤራትርዮ ለትጠወረ ሕሸዋታት ቃለ ተ።

ዮመቴ፡ 63ይት ሰነት ዝክረት ሄለል ሰብተምበር እተ ንትዘከር ዲብ ህሌን ኢት፡ ለማሌ ክቡድ መሰል ለዐለ ወለተዐውትን ዲቤ፡ እለ ዮም ክቡድ መሰል እትና ለህለ መሐለኪት መጃል ብንዮት ወጠን ወኣግደ ህዩ ኣከደት ዐማር ወብንዮት እቅትሳድ ትፋድ፡ እግል ንትካር ዲቤ ክም ቱ ሰበት ለኣደርሰ፡ እብ ደማነት እት ነፍሰና፡ ለመካሰብ ንዳልና እት ነዕቅብ፡ እብ መትሰባል እግል ንሸቁ ዲቤ ወጅብ።

ሰካን ገሉጅ፡ እብ ውሓይዝ ለከርብ ጽርግዮ እብ ኬወ ለኣሰኑ

እት ምዳርየት ገሉጅ፡ ዝላም ቅዝር እበ ሰበብቴ ውሓይዝ ለከርብ ክጠዮ መዋሰላት እግል ኣሰነዮት፡ ኬወ ርሒብ ትሰርገለ።

ክም ክፋል ናይሉ እብ ሰዳይት ሸዑብ ወኣንፋር ዲሽ ልትሰርገል ለህለ ወራታት፡ ሰካን ሸብህ መዲነት ገሉጅ ወእተ ደዋራት ለልትረከቦ ኣንፋር ዲሽ ሸዕቤ፡ እብ ውሓይዝ እንዴ መትገላድ ብቐት ሰብብ ለዐለ ቢንተ ክምሰል ኣሰነው፡ እግል ካድም ለኣትመቃርሕ ለህለ ጀሚትረ ዓንቀጹብርሃን ትካቦ ሸርሐ።

እተ ወራት ለትረኡት መሻረከት ወመትሰባል ለሐመደ ጀሚትራ ዐንቀጹብርሃን፡ እብ ሰብብል እብ ትሉሉይ ትዘልም ለህሌት ዝላም፡ ገሉጅ ምሰል ሰነይ ወእምሐጃር ለተኣትራክብ ጽርግዮ እንዴ ከርቡት፡ እት ሐረከት መካይን መሻክል ትሰብብ ሰበት ህሌት፡ ሸዑብ ለኬወ እግል ለኣተላልዮ ትፋን።

ግብለት፡ መዳፍዐት ዐገብ ወጀራይም

ዛህራት ዐገብ ወጀራይም እግል ልትከረዕ፡ እት ረቡዮት ዓዳት ወሰዋልፍ መጅተመዕ እብ መቅርሕ እግል ልትከደም፡ ቃእድ ፖሊስ ኣቅሊም ግብለት ኮሎኔል ዘሚካኤል ተኻልዮ ኣትፋቀደ።

ምሰል ሰካን ምዳርየት ድባርወ ወእምኒ-ሐይሊ እተ ወደዩ ህድግ፡ ኮሎኔል ዘሚካኤል፡ ሸዑብ ሰዋልፋ ወነግራሁ እቱ

እግል ለኣፍዘ፡ ኢመፋህመት እተ ትትረኡ እቱ ወክድ ህዩ እብ ዕራት እግል ለኣሰክበ ለህለ ለመድ ዝያድ እግል ልትከደም እሉ ትፋን።

እተ ሐልፈ 6 ወርሕ እት ምዳርየት ድባርወ ወእምኒ ሐይሊ 264 ዐገብ ወጀራይም፡ ክምሰልሁም 723 ኪደት ቃኑን ተራፊክ ክምሰል ትሰጀለ እት ለሐብር፡ ኣሰባቡ ወመደረቱ

እብ ፋይሕ ወደሐ። ኮሎኔል ዘሚካኤል እት ደንጎቤ፡ ዋልዲን ምሰለ ህሌት ዝላም ቅዝር፡ ምን ብቐት ውሓይዝ ወወዲቅ ኣብዮት እግል ልንገፍ፡ ሸዑብ እብ ዓመት እት ርዕዮ ወዐማር ጀራዲን ለክድሞ ሐረሰቶት ወሰብ-ንዋይ ህዩ እብ ፍንቱይ፡ መደጋግ እግል ለደው ኣትፋቀደ።

ኣደቲርዮግራፊክ

ክል ኣርቡዕ ለትጠ'በዕ ጀሪደት

መዳልያይ፡
- መሐመድ እድሪስ

ለይኣውት ወኣርተዖት
* ዘህረ ዐለ
* ፋዋን ኣድም

ተለፎን፡ 121797/07121322
ፋክሰ፡127749፡ ዕ.ሰ.ቡ፡ 247

ተውዝዕ ጀሪደት፡
ተለፎን፡ 200454

ኣትኣመሮት፡
ተለፎን፡ 125013፡ ዕ.ሰ.ቡ፡ 1284

፬ኛ ክፍል

ከራዊ ቤቼ

ሰብ ምግብ ፍንጭ ሐማት ወደሰት ወል እት ክልኦት መዐሰከር ትካፈለው። ገሌ በዲር ቀዳሚተን ወእኔ ሓራተን ሰዳሊ። “የሀው እለ መርዓት እት ሐቀ ህሌት፡ እምበል ሰዳይት እም ወሐማት እብ ክልኤ እዳህ ወእብ ክልኦት ጥበ እግል ሰለሰ መንታይ ዐብት እግሎም ህሌት፡ የም እምበል ሕርዶነ ወምራደ ለትገብእ አለቡ። ረቢ እንዴ ፈርሀው ምነ እት ምራደ ልሕከጥ እግል” ልብሎ እት ህለው።

ለካልኦይ መዐሰከር “ግድም ላመ አንሰለ ውላድ ረቢ በኪተተን ለአምጸኦነ” ቤለው። እግል ሐም ኢሊሐሽጥ ምሐማት፡ እንዴ ኢኮን ህታመ ክምሰሌህ ሞልዳይታተ ኢኮን” እት ልብሎ ገዮቶም ሸንክት ሐማት ትትደለል ዐለት።

እት ደንገበ እብ ምስምሰ ትሰዳኪ ህሌት ወእም ክለክም ተ እግል ከሚሰ ወጅምዐት ምስል አቦተ ቲደዩን ሞፈቀት ምስሎም እም ወለት። ክሚሰ ምስል አቦተ ትትመዬ ወጅምዐት ናይ ምሴ ምስል አብሀ አሰክ እመ ወለ ክልኦት መነቲተ ተዐይሮም ዐለት።

እሲት ወልመ እት ሐማተ እንዴ አተሰለት “ዐመቶ ግድም እንቲመ እም ክሉ ዐድ ኢኮን እንቲ ክልኤ ምስልኪ ቲደዩን ወጅምዐት እትን ትዲር” ቲል ልበ እግል ተአብርህ እተ።

ሐቆ እብ ክእኒ ከም ሳምን ሓለፈው” መዳም ክምእኒ ለመሰል ሸዑር እቡ ሸዐት። ሐቲ ነፃር ምን ስኮብዬ ቅንጻት ንፋዝ እበ በል አበልኩ። እደይ ጣሰሲኒ ወሐራፊጫ። ገሮብዬ ትሳኪ፡ ገኖብኛ ትተተ። ሐንገልዬ ትረበሽ ወመሻዕርዬ ትሐምረገ። እግል እሰኪ ወሀረብ ሐዜ ምስካይ ወምድሓን ትቀዌት እኛ። ተሮክያይት ወዴኮ። “የሀው ርድኡ፡ እዘሞ ምንዬ። እዘሞ ምንዬ” እት እብል ምንዳመ ክርንኛ ወቀልኩ። ልክያዬ ወትርክዮዬኛ ምንዬ እንዴ ሐልፈት ለሰምዐ ደዐለ። ገሮብዬ እብ ተዐብ ወሀላግ ፍክርዬ ወዐቅልዬ ሌጠ ሐምረገ።

ክልኤ ዕንኛ ምን ስኮብ እብ ሐሊት ፈትሐኮህን፡ ስኮብ ሐቆ እለ ክምሰል ኢረክበኒ ለትጋለደ ምስልዬ መሰል እኛ ከትፈንቲኒ። ሐቆ ሐሚር ኢነት ለእት ረሽ ዐለት እዴ ምስል ክልኤ እዴ እንዴ ገብኦት እብ ደሚር ብሪእ ወሀም አለቡ አግሩዝ ሻመሊያ።

አልሐምዱላህ ውላጄ ዕምሮም ሰሰ ወሬሕ ገብኦው። እሊ ህዩ፡ እግልዬ ልግበእ ወእግለ እዬ ለአምሮ ለዐቤት ዐውቴ ዐለ። ውላጄ ደለ ለረአዮም ስኮብ ናቅሰ ምናም ክምሰልቱ ላልፍህም ደዐለ። ላኦትፈክር ጋር ላኪን ለእግል ክልኦት፡ እት ከብደም ትብጥር ደዐለት። ክልኡቶም ልሸሕጎ ዐለው። ወአሰክ ረዳዮቶም ቱ ዕንታቶም እት ገኔሕ አሰክ

እት ልሸሕጎ ገደሶ ዐለው። እት ገጸም ፈርሐት፡ ወለውቀት ልትብዩን እግልኩ፡ ግርቦም ግሩም ወአውጅሁቶም ገጽ መላእክት ልትርኤኩ። ፈጅኦተን ሐቆ ክልኤ አምዕል ለሰኔት ዐለት ሓለቶም እት ድደ ትቀየረት። ገሮብ ቀሽብ ገብኦ። ሸልሐ፡ ህምራ፡ ቀጥኦ፡ ኦነ ትሐየርኮ ወምሰልዬ ሐካይም ትሐየረው። ደዋሆም ለኢሊሐሽጻሕ ወኢሊኦትሐውዝ ለኢደርር ወኢነፍዐ ገብኦ። ሳልሰ የም አሰክለ ማሱረት ሴዓት ልግሼ እግል ሕጻብ፡ ምን አሰር ሐልብ ክልኦት ጥብዬ ለእት ነሐርዬ ወልግሼ ጀልሕ ለዐለ” እት ትብል መሻዊት ሐያተ ትዳግም።

ሐቆ እለ ብእሰ እግል ሰለሰ መነቲት እብ ክልኤ እዳህ እንዴ ጨምረዮም ከቅርኦን እግል ልቅረኦ እቶም አሰተብደ። ክሉብ አሰመ ወያሲን እግል ልግበእ እግሎም። ህተ ላቱ ክምሰል መጅኑነት እብ ብካይ ውላደ ምናም ወለዐል እት ዐሎልበት ጋብኦት ዐለት። እብ ፈድል ረቢ ምነ ብካዮም እግል ለህጎት ቀድረው። ብእሳመ እብ ዕን ረሐመት እት ለአትቃመተ እግል ትሰከብ አጀዘ እግሉ። እግል መደቲት ሕድት ቀመት ስኮብ ክሰክት። እት ስኮብ እት እንተ እት ገጸ እብ መትቃመርት ፊፊእ ቅጠር ሐሰት። በል ክምሰል አበለት እሊ ኢኮን ብእሰ እት ረአሰ አናብዑ እት ረአሰ እት ልትቃመር ፊኤቲ።

እብ ድንጋጸ በር ምነ ቤት ክምሰል ፈግረት እሎም ኢኮን ውላደ፡ ዕንታቶም እት ገኔሕ ምን ሐረክት እንዴ ትጀመደው ጸንሐው። “ዩቡ እኩይ ረከብኩ! እምክም ጨበል ካፈለት። ሚ ገብኦው ውላጄ!?” ሚ ጀሬት እቶም!?” እብ ወቀዬ ኢተዐውትኩ። ሚ ኤርኤ ህሌት ወእሰምዕ!?” ሐገልኮ አክረብኩ” እት ትብል ትረገመት ወትሰአለት እንዴ በሊሰ ኢትረክብ።

ብእሰ ሸዑሩ ክምሰል ሸዑረ እት እንቱ ቅብላተ ክልኤ እዳህ እንዴ ረበዐ እብ ደሚር መሸቁል ወፍክር ርቡሽ ለአተቃብለ ሐቆለ ጸንሐ። እብ ክእኒ አፍሁ ፈትሐ ምስል። “እስትቅፋር በል ለሀቤናቶም ናሱ ልሸፊዮም ወልንሰኦም፡ ሕነ ሚ ህሌት አዜ እት እዳኩ። እንቲ ህዩ ፍክርኪ ኢትረብሽ። ወእት ህላግ ኢትትካረይ ወኢትካሪኩ። (አዑቡላሂ ምን አሸጣን አረጃም) ያረቢ እንታቱ እበ ለእተ ህሌነ ትደሌ! እግልክ ንትሰአል ወእት ርክንክ እንጅእ ነጃት አሉብነ ወመንገፎ ምስካይ አሉብነ ወምድሓን ዓሬነ ወኔጃነ ገሉብ ግበእ እግልነ ወዐፎ” ቤል ክእት ረቢሁ ሐዜ። ለወክድ ለሀይ ሳዐት አርበዕ ጽብሕ ምድር ቱ ለዐለ። እብ በዩ እግል ሊጊሶ ወስከው”?” እት ልብል እሰልፍ አትሓጠረየ

ወሐሬ ትደዐ ወእብ ሰአል ህግያሁ አትመመ።

እም ወአብ አሰክ ዕያደት አተጅሀው። ሐካይም ገሮብለ አግሩዝ ሰበት ተክመ ወሀምረ ሕግነት ሐቲ ረገብምተ ወካልኦይት ልሰሐብ ምናም ክለአፈገረ ምናም ዐለው፡ ፡ አሰራር ክሉቅ እቶም ክምሰል ደዐለ ትሐበዐ። እደዮም እብ እበር መንፈት ገብኦ። ምን እደይ እት እገር ትክረው። አጀኒት ልትባኪ ወሐካይም ሕግነት ሐቲ ረገብ ወካልኦይት ልሰሐብ ወዐለው። እምም ቅብላት ውላደ እት ቅያብ ትካሬት። እብ ሚ ትጀሬ እቶም ተሮክያይት ወቀለት። “ከፊክም! ከፊፊፊፊፊፊክም! እዴዴዴዴዴዴ ምናምናም” እት ትብል ዲድ ትቤ እቶም እብ መውዲ።



ዎሮት ምነ ሐካይም እንዴ ቀርቦዩ “ሀብሸርኪ! ሸር አለም እለ ሕመት እለ እትሊ ዕምር እሊ ለህለው አግሩዝ ተአደምዕ። አዜ ዑውታም እተ ህሌኩ። ኢትፍርሂ። ሴመ ኢገብኦ” እት ልብል አትሓጠረየ። ብእሰ ምን ቅብላት እብ ልብ ግሂ ወደምር ሐዘን ለአትቃምቶም ዐለ።

ላመ ደርብ (እንፍጅን) እብ እግሮም አሰራር ሰበት ትረክበ እግል ልሰረፍ እቶም ቀደር። እመ ወአብህ አትገጀዐወ ወለአትሓጠረወ ከሕቃብ ወክብብ ገብኦም እግል ወዐለው። ለአግሩዝ መነቲት እብ ፈድል ረቢ አፍሆም ምን ብካይ አዝመ ወቀበሊት እተ ዐረት እብ ስኮብ ትማደደው። እትሊ ወክድ እሊ ሐማተ ረሐ ሓድገት እት እንተ መጸአቶም። እሲት ወልደ መስኪነት ምንለ

እግል ፈርሀት ኢፈግረት መሰለ እተ። ሐማተ ጠበሻ ቲሎም።

መዳም እት ሰላመ ክምሰል ኢትትሃለግ አምረተ ሰበት ዐለት አሰክ (ሪታል) አሰክለ ለርታል ሰክብ እቱ ለዐለት ሰሪር አሸረት እግሉ። ወእተ ሐሰፍ አበለት አርወሐት ዝምትት ምነ እት እንተ፡ ክልኤ ዕንተ ብካየ ወመካሪት እግረ እንዴ ኢትደሌ ተ ለትሰዴ ለዐለት።

ወልደ እት ልሰዴ እንዴ መጽአየ ክምሰለ ሐብሬል ሐኪም ደግመ እግሉ። እሲቱመ ሻም ሐማተ እት ረአሰ ወለት ወልደ ዛይድ ውሓልፍ። ክምሰልቱ ሰበት አመረት እት ትሰዴ እንዴ መጽአተ ክምሰል ተሞመኦንን እብ ሓለት ዓፍየት ወለት ወልደ ደግመት እግሉ። እሊ ሰድ እሊ ሐማት ክምሰል ላበት መክረህት በትክ። ራክበት እት እሲት ወልደ እንዴ ትወለበት። “ክሉ እብ

ወለት ወልኪ ምንዲ ትገብእ ምን አቦትመ እም ኢኮን ትቀርብ!? ኦነ ምነ ሕማመ ሚ ገብእ እረክብ!? ዙዕኪ ኢተአብዘሐ። እት ውላድ ርሕምዬ ምንዬ ወለዐል እንቲ ርሕመት እግል ትግብኢ ትሐዘ!?” ረቢ ኢትፈርሂ? ግድም ሰም እግልዬ!? ኖሼ ኢኮን ለአኪ ምስሎም ለህሌኮ!? ወለት ውሀር! ዐጀብ! እሊ ላተ ረሕመት ኢኮን፡ ቀብጠርጠር ቱ እብል አነ” ትቤ ክምን ክል ቀጥፈት ቀንጠፈት ወለክፈት። ብእሰ ፍንጭ አክይ በሀል እሲቱ ወእመ እብ ዲደት በሸለ። ምን ሕሚት እመ እግል እሲቱ ሕጌ ወክራር ጋብእ እንዴ ዐለ እሲቱ አዜ ደንብር ዞዕ ክምሰል ሳቀቀት እብ አክይ ወጅህ ለአትቅብለ ዐለ።

መዳም እግል ሓለተን እብ ክእኒ ትዳግመ። “ክልኤ ዕንኛ አናብዐን ክምሰል ዲን ለምን ዴማት ቅዙር ትዛሬ ነጻፍ አበዩ። ግድም እት እበኪ ውሓኪ ቅባል ገብኦት እግሉ። ሐማቼ እት ትበኪ እት ወለኛ እንዴ መጽአት ሰዐመተ አተልገተ። አትሰሐቀተ፡ አትሳረረተ፡ አናመ ትፈክርኮ እብ ልምሰል ወለኛ ዐለ እግል ሻም ዛይድ። ሐቆ አምዕል እብ ተማመ ወዐል። ለአግሩዝ ለቀይእ በጥረ ምናም። ሕናመ ክምሰል አተድሐነ አሰክ ቤትነ ገበይነ ትማጤ። ለዛይድ ሻም ሐማቼ እት ረአሰ ወለኛ ስኮብ ላሊ ክልኤኒ። ለእግል ትፈቱ ወለኛ እግል ደንሰእ ምነ ቀሰድኩ። እግል ምስል ትንሳኦ ሐሰብኩ። እንዴ ትወለብኮህ ወለኛ ምስል እግል ትንሰእ ትፋህምት ምስል። እብ ገጽ ፋርሕ እት ገከሐኒ፡ ትበሰም ወዴት እግልዬ። ወእት ውዳኛ ሐመደተኒ። እግል ትራዕየ ክምሰልቱመ ይሐብዐት ምንዬ። ብእሽ ክምሰል አቅመትኮ እብ ረደ ወፈርሐት እግል ወዳኛ ትከበታዩ። እምዬ ውላጄ አሰክ ቤቶም እግል እንሰኦም እት ትሓዜ አትቃመተተኒ። ህተ ዲብነ እንዴ መጽአት እግል ትሰዳኒ ሰበት ኢትቀድርቲ። መኪነት አቡዬ ገበይ ትማጤት እብኩ። ኦነ እት ደሚርዬ እብ ፈርሐት ወለውቀት እሸዕር ዐልኩ። ክልኤ እዳዬ እንዴ ረፍዐት ዕንኛ ሰመ እት ገንሕ እት ረቢ ትዳኮ። (ያረቢ ሐምዴ ወሸክር እግልኩ። ለሴድያይ አለቡ እግሉ ትሰዳ። ምኑ ሐቲ እንዴ ኢትሐዜ ትቤ” ከቀዳሚተ ትፋቀደት ሕሻኪ እግላተ መዳም።

መንበር ሐያት ወትመክረህት፡ ሰአየት ምንዲ ኢትህሌ። ረቢ ሰአየት ኢሊአጽብረኒ። እግል እት ጨባብ ኢንትከረፍ። እብ ጨባብ መንበረት ለአምር አለቡ። እምበለ እት ጨባብ ትከረፈ። ለኢትሐልፍ አለቡ። ሰኔትመ እብ እኪት ትትብደል። ነፍሰነ ሰብር ትድቀብ ረያመ እብ ሕንኩሽ ትትበጽሕ። ሰብር ወሰአየት ኒዴ እግል ንትዐውት።

ሙሰውር- ኩባር ጸሃዩ

መጽሐፍ ዐግር ወኪልነት እጅግ ግልጽ ምዕርዮት ፎርቶ ሳወ ሚ መሰል ክም ህለ እግል ንድሌ ምሰል አሰይድ አረጋይ ሙብራህቱ ናይ ዶሎ ሙዕር ምዕርዮት ፎርቶ ሳወ ሃድጋም ዐልጎ። ከታምም ጽባባ ናይ ምሰሎ ለወዳኛህ ህድግ እትላ ናይ ጥብባት ህለ። ቅራኝት በኪተት።

“ምዕርዮት ፎርቶ ሳወ ለበዘሐ አርደ ጋድጥታት። 13 እዳረት ደዋሐ 80 ለገብእ ዐደታት ህይ ከምክም። ቀውምያት ትግራ። ብዳዌት ወትግርንዩ ከምሰልሁመ እብ ሐድ ዐደድ ክም ናራ ብሌን ወሳሆ ክብረ ህለው። ዝያድ 8 አልፍ ለገብእ ዓሊላት እብ ትንፋሰ ህይ 34 አልፍ ለገብእ ሸብ ህለ ዲቤ። ክም መንጠቀት እብ ምፍጋር ጸሓይ ምሰል ምዕርዮት ድጌ። እብ ግብላት ምሰል ህይተተ ወሰነይ። እብ ቅብላት ምሰል ምዕርዮት ከርከበት ወእብ ምውዳቅ ጸሓይ ምሰል ደውላት ሱዳን ለትትሓድ ምዕርዮት ተ። እለ ምዕርዮት እለ ብዘተክ አርዳቅ ለትመልክተ። ክም መሰል ህይ ለበበ መርከዝ ተድራብ ክድመት ወጠን እት ምግብ ናይ እለ ምዕርዮት ሰበት ህለ እለ ምር ምን አሃምየት ለልሃይባቱ። እት መጽሐፍ ዐግር መ ርኤን ምንገብእ ርሒብ ጀራዲን ለትመልክ ወብዘተክ እተይ ለልትረከብ ምናተ። እብ ብንየት ትሕትየት ርኤን ምንገብእ ህይ ጣፍሕ አግቡይ ለትመክተ። ክም ገበይ ፎርቶ ሳወ አሰክ ህይተተ። ፎርቶ ሳወ አሰክ ግርማይኩ። ፎርቶ ሰወ አሰክ አቁርደት ወከርከበት እብሊ እብ ክሉ ትርእየ እት ህሌክ ገጽ ቀደም ተአሳድር ለህሌት ወብዘተክ ከይራት ለህለ እተ ምዕርዮት ት እግል ኒበል እንቀድር።

መናበረት እለ ሸብ እለ ለበዘሐ እብ ርዕዮ ለልትናበር እት ገብእ። ዲብ ወክድ ከረም ለልትሓረሰ ግራህ ወክልዶል ለልትሸቁ ጀራዲን ወእብ ናይ የውምየት ሸቅል እትሊ ጀራዲን ለሸቁ። ከምሰልሁመ ሐድ ዲብ ትጃረት ለልትፈረር ቱ ነብረ ለህለ። እለ ምዕርዮት እለ ሐለት ዝላም ናየ ትርእየ እት ህሌክ እት ክልኤ ልትከፈል። ለግብላታይ እንክር ጋሽ ለተሌ ዝላም አጊድ ተአሰብድዩ ወደሐን ቱ። ለእንክር ቅብላት ምዕርዮት ከርከበት ለተሌ ላኪን ዝላም እንዴ ተአከር መጽኡ ወአጊድ ተአትካርም ምኑ እብሊ እተዩ ናይ ሐርሰ ጀራዲን ኢገብእ ምንገብእ እብ ዝላም ከረም ለልትረከብ እተዩ ሐድተ። እትላ ምዕርዮት ላኪን ሐረሰቶት ሰብ ጀራዲን ምን መሓዛት እበ ረከቡ ማይ ከረም ወሐካይ ለአፈሩ ህለው። እለ ህይ እት እስትቅራር ወመናበረት ናይ እለ ሸብ አካኑ ዐገይተ ህሌት። እግልሚ ላመ ጃርዲን ኢመልክ እተ ጀራዲን እንዴ ትፈረረ እብ ድራሩ ለዐይር ሰበት ህለ። ለህለ እተይ

ምዕርዮት ፎርቶ-ሳወ እተዩ ዐዳገ ጠልብ

ህይ ምን ኬን እለ ምዕርዮት እብ ደረጀት ወጠን አሰክ አሰመረ እንዴ ጌሰ ዲብ ዐዳጋታት አሰመረ ለሻርክ ወለልትዘቤ በሰል። ከመዶር። ዱብ ወእክል ናይ ጣፍ እንዴ ኢተርፍ ፈሬ ወልትለክክ ህለ። ምን ብዘሐ እተይ ናይ በሰል ህይ ሐረሰቶት አሰክ ዐዳገ ኢረክብናኒ ለአፍሬናህ እምበል ፋኢደት ግምሽ ልትለከፍ ህለ እት ልብሎ ለልአትግርር እቱ ወክድ ህለ። ሰበት እለ ምዕርዮትን እትሊ ወክድ እለ ተአፈሬ ህሌት ሌጠ እንዴ ኢገብእ እተዩ እት ዐዳገ እንዴ በዘሐ ዝያድ ሱቅ ለሐይ ህለ።”

እት ምዕርዮት ፎርቶ ሳወ ገብእ ለህለ አሸቅላት ሕፍዘት ማይ ወትርበት እበ ከሰሰ መ እትወደሕ አሰይድ አረጋይ። “ግሩም ሸቅልቱ ልትሸቁ ለህለ እትላ ምዕርዮትን እት 5 እዳረት ደዋሐ ሸቁይ ለህለ አክረት ዲብ ናይ ርዕዮ ባካት ለቀጠረት ቅጥረት ክም ትትክራራ ወትርበት እብ ወሓይዝ ክም ኢትትገሌ ልትክደም ህለ። መንፈዐቱ ምሰል እለ ለእንቤሉ ሸብ እንዴ ሸቅ እብ ድራሩ ለዐይር ምኑ ሌጠ እንዴ ኢገብእ። እለ በካት ናይ ርዕዮ ለመድ እንዲኢትን ናይ ሸቅል ለመድ ሰበት ኢባለ እግሉ እትሊ ወክድ እለ ሰብ ተብዕን

ውላዱ ናይ ተዕሊም በክት እግል ልርከብ ኢቀድርን። ንኡሹ ወዐቢሁ ከደማት ዓፍየት አትሐዘዩ ምንገብእ ወክደማት እዳረት ሐዘ ምንገብእ እለ ክሉ እለ እምበል መትከምካም ሰበት ኢገብእ ሸብ ከደማት እጅግ ግልጽ እግል ልርከብ እግል ልትከምካም ህለ እግሉ። እብ ጃንብ ናይነ ህይ እት አፍሃምት እንዴ ረከዘ እንሸቁ ህሌን ሌጠ እንዴ ኢገብእ ከደማት እጅግ ግልጽ ሸብ እተ ለትትወጤ እግሉ አካን እግል ልርከብ ልትሸቁ ህለ። እለ ህይ ምሰል ለዐለ ለመድ ወመናበረት ርዕዮ አሰር ንዋይ ጌሰት እግል ትቀይሩ ብዘተክ ወክድ ወካድም ለልሐይቱ።

አሰክ እለ ጋብእ ለህለ ከደማት እጅግ ግልጽ ህይ እብ ፍንቱይ ማይ ምን እርኤ እት ክለን እዳራት ደዋሐ ናይ ሶላር ወመቶር ማይ ለኢገብእ እተ ኢህሌት። ምን እዳራት ደዋሐ ወኪን መ እት ገሌ በካት እት ዐደታት ለገብእ ከደማት ማይ ህለ። ለህለ መሻክል እዳራት ናይላ ማይቱ እግልሚ ሕኩመት ለናይ ማይ ክድመት ለትሃይብ ዓለ ክም አዳሌት እግል ሸብ ሰበት ትሰልመ ዲብ ነዳፈት ወአግቡይ መትከምካም ከምሰልሁመ ምን ክድመት ማይ

እንዴ መጽኡ ቀደም ውላደት ወዶል ውላደት መራዕየት እግል ልርከብ ጅህድ ገብእ። ለብዕድ ሕምም ህይ እትለን መአሰሳት ዓፍየት እንዴ መጽኡ ልትሳሬ ሰበት ህለ ለሳደሬ መሻክል ኢህላ። ምናተ ለፈሃም እግል ልዕቤ ለህለ ከደማት ሸብ ክም ለአሰተፊድ ምኑ እግል ልግበእ ንሳዕ ተዕቢአት ገብእ ህለ። ለህለ መአሰሳት ህይ ካሬ ህለ ምንመ ኢልትበህል እግሉ ለሰዱ እት ክል ዐዳታት አጋር ሐካይም እንዴ ደርሰው ፍሩራም ሰበት ህለው ሸብ ደሐን ክድመት ረከብ ህለ እግል ኒበል እንቀድር።

ከደማት ተዕሊም ዶል እንብል እብ ደረጀት ሕኩመት ተርኪዝ እንዴ ተህየቡ እብ ዝያድ ለልትሸቁ እቱ ቱ እትሊ በካት። ምን ረውዳት አሰክ ካልኣይ ደረጀት መዳርሰ ህይ እትላ ምዕርዮት ህሌን እግል። ለመሻረከት ላኪን ክምመ ሕኩመት ለትሐዘዩ በጽሐት ኢህሌት። እብ ፍንቱይ ዲብ መናጥቅ ናይ ብዳዌት አሰክ እት ከረ አዳርሰር። ዲብ ከረ መሎሸር ወሆሚብ ናይ ቦርዲን መዳርሰ ጋብእ እግሉም ምንመ ህለ ለመሻረት እት ተዕሊም ንሳዕ ክምመ ተትሐይ በጽሐት ኢህሌት። እትክሉ ዲብ ምዕርዮት ለህለ መዳርሰ



አሰይድ አረጋይ ሙብራህቱ

ደረጀት አቅሊም ለእንርእዩ ምንማቱ እብ ደረጀት ሕኩመት ለሓል ምን ለሃሌ ሕናመ ክም ወኢሰኣነ ሰበት ንአምር ክም ናይዶሎ መሻክልን እንዴ ትከበትናህ እትብር ህሌ። ናይ እትሰላት ህይ እለ ምዕርዮትን እት ገሌ ህለ ወዲብ ገሌ ኢህላ። ክም መሰል ዲብ በካት ፎርቶ ግሩም ህለ ዲብ ከረ ግርማይኩ ርብድ አዳርሰር ላኪን እትሰላት ሰበት ኢህለ ምሰሎም እግል ንትራከብ ብዘተክ መሻክል ህለ እግል። እብ ልኡክ ዲብ ወሬሕ አው ክልኤ ወሬሕ ቱ እንዴ መጸውነ ለንትፋህም። ናይ ከርህበት ህይ ምሰል መዳርሰር ሳወ ሰበት ህሌን እለ ምዳነትን ክድመት ከርህበት ምን መዳርሰር ለሐሰ ክድመት ለትረከብ መዳነትን ፎርቶ ሳወ ተ። እምበልሁ መአሰሰት ተዋብ ንዋይ ወብቅል መ እትበካትን ሰበት ህሌት ናይ ማይ ከደማት ወናይ ትራክተራት ከደማት ምን ቅሩብ እግል ንርከብ ለእንቀድር እብ ሰዳይት መዳርሰር ሳወ ወመአሰሰት ተዋብ ንዋይ ብቅል ኤረትርዮቱ።”

እት አክር አሰይድ አረጋይ ዲብ እለ ሐጪር ወክድ ክም በርናምጅ እግል ልክደም እቱ ጸብጣሙ ለህለው እት ወደሕ። “እሱብዱይ ለህለ ናይ ከረም ሐርሰ ተብዶት። ሐረሰታይ እንዴ ሐርሰው እት አክር ክእፎ እተይ ረከቦ ምን ባልዲን እንዴ ተሓፈዘ ምር ምን ጸብጣሙ ለህሌን በርናምጅ። ከምሰልሁመ ናይ ድንገር ዓዳት ክም ክሸቦ አዋልድ አንሳት ወሀዳይ ሰነት ዕምር ለኢበጽሐዩ ሸብ እግል ልፍዘዕ እግሉ አፍሃምት። ብዕድ ተዕቢአት መዳላይ እግል ተዕሊም ሰነት ድራሰት። ምን ወሬሕ አንሰት እንዴ አሰብዳነ ምሰል ዐገይ ዐድ ውብዕዳም መሻረት እት ተዕሊም ምን ልህሌቱ እብ ክእፎ ተዐቤ ሐብሬ ወታዕቢአት ውድዮቱ። ምሰል እለ ሸብ እት መጽሐፍ ዓፍየት ፋህሙ ክእፎ ክም ዘይድ ወዲብ መአሰሳት ዓፍየት እንዴ መጽኡ ክም ልትሳሬ አፍሃምት። እምበል እለ መትከምካም ወአግቡይ አዳርት መአሰሳት ማይመ ምን ህለዩ ዲብ ለሐሰት ደረጀት እግል አብጽሓት ምሰል ከሰሰም ጀሃት ዲብ ንትፋህም ወሐብሬ እት ነሃይብ እግል ነአንዩ ምን ጸብጣሙ ለህሌን በርናምጅትናቱ” ለበበ ላኪን እተይ ሐርሰ ጀራዲን ፎርቶ ሳወ ዐዳገ ለረከብ እብ አግቡይ እግል ልትረከብ እግልን ከዳምቱ” ልብል



እንዴ ኢገብእ አንሳት መ ለሻርክ እቱ ደረጀት እብጽሕነ ሰበት ህለ ዲብ ለመድ ሸቅል ናይ እለ ሸብ ድራሩ ወተጃርብ ሃይብ ህለ። ምሰል እለ ናይ ሸቱል ዕጫይ ሸቅል ዲብ ፍሩራም ህሌ። ዲብ ሌጠ እንዴ ኢገብእ እት ጀራዲን። መአሰሳት ሕኩመት። መዳርሰ ወመዳብድ እንዴ ኢተርፍ ዮም ዓመት እትሊ ክሉ ሐድ 80 አልፍ ለበጸሕ ሸትልቱ እዱልዮሙ ለህሌ።”

ምዕርዮት ፎርቶ ሳወ እት መትከምካም ህይ ሚ ትመሰል ምን እንብል አሰይድ አረጋይ። “እለ ክል ዶል ለንትሃጌ እቱ መጽሐቱ ሐድ ናይ ማይ ከደማት መሻክል ለአምጽአዩ አሰባብ ምንመ ህለ እትሊ መጽኡ ወክድ እለ መሻክል እለ እንዴ አርሂን እግል ሸብ ዲብ ትትወጤ አካን መትከምካም እግል ነአተላሌ ክም በርናምጅ እንክድም እቱ ህሌ። እግልሚ ሸብ ኢትከምካም ምንገብእ እግል

ለዐድ ለትትረከብ ሚዛንየት እብ ክእፎ ትጸብጥ ወመቶር አው ሶላር ከርብ ምንገብእ ክእፎ ተአሰኔ እትሊቱ መሻክል ለህለ። እግል እለ እግል አሰነዮት ህይ ዲብ እለ ወክድ እለ ለሚዛንየት እንዴ አከበው እት ባንኪ ክም ከርወ። ወመሻክል ሰብር ሳደሬ ምንገብእ ምን ሚዛንየት ክም ለአሰነ እንዴ ህሌ። ሰብ መቅደረት ናይ አሰነዮት ሶላር ወመቶር ላኪን ምን አቅሊም እግል ተአምጽኦ ንሳዕ መሻክል ህለ እግል። ለሐል ህይ ምን አቅሊም በደል እንጠልብ እት ክል እዳረት ምዕርዮት ሰብ መቅደረት ምን ልትሃየቡን ለመሻክል እብ ቀላል ገበይ ሐል ወረክበ።

ከደማት ዓፍየት ህይ 1 መርከዝ ወ4 ዕድደት ህለ። እለ ህይ እግል ክሉ በካት እግል ልትሳሬ ዲብ ለቀድር እቱ ጋብእ ህለ። እለ መአሰሳት እለ ሸብ ክእፎ ልትሳሬ ምኑ እብ ፍንቱይ እማት ዶል ዕምሰነ ወውላደት ሕኔ እት ቤት ወልደ አሰክ ሕክምን

ለህለው ደረሰ 4 አልፍ ሌጣቶም ለህለው ክም ዋጅብ ላኪን አሰክ 6 አልፍ እግል ልብጽሖ ዐለ እግሉም። ሕኩመት ጅህድ ወዴ ምንመ ህሌት ለፈሃም ሙጅተመዕ ዲብ ተዕሊም አሰክል ንሳዕ ህለ። እብ ፍንቱይ ዲብ መሻረከት አዋልድ አንሳት። እለ ለከሰሰ እብ ደረጀት ምዕርዮት ለጅነት እንዴ ገብአት እግሉ እተ ትመጽእ ሰነት እግል አሰነዮቱ ዲብ ክሉ በካት ምን አይ እንክድም ህሌ።”

ከደማት መዋሰሳት። እትሳላት ወከርህበት እት ምዕርዮት ፎርቶ ሳወ ሚ ከም መሰል አሰይድ አረጋይ ዲብ ሸርሕ። “መዋሰሳት መሻክል ህለ እግልን አግቡይን ጣፍሕ ምንማቱ አተቡሳት እግል ሸብ ለከድመ ሰበት ኢህለ እብ ናይ ትጃር ንአይሸ መካይን አሰክ አቁርደት እብ 150-200 ወምን ፎርቶ ሳወ አሰክ ህይተተ ለከምሰልህ እትደፍዕቱ ሸብ ልትሐረክ ለህለ። እለ መሻክል እለ ሐል እግል ልግበእ እግሉ እብ



መጅልስ አምን ወለዛልም ቀራራቱ ድድ ኤረትሮፕ (32ኛ ክፍል)

እብ ዶ/ር አሕመድ ሐሰን ድሕሊ
ተርጅሙት፡ መሐመድ እድሪስ መሐመድ

ሳልሳይ ምዕራፍ

መሳሌት አሜሪካ ዲብ ሶማሊ ሚ ቱ?

ጂኦ እስትራቴጂያዊ ወጪተኛዎች መሳሌት ሕክምና አሜሪካ እብ ክእን ለተሌ እግል ልሸረሕ ቀድሮ።

1. ሶማሊ እብ ህለ እግል ሐድ 3000 ኪሎሜትር ሰዋሕል በሐር። ዲብ ምሐፍ ህንድ፣ ፍንጌ ሸለግ ባብ አልመንደብ ወኸሊጅ ዐረብ ክምሰልሁም ዲብ ክሊጅ ሀርግዝ ምህም እስተረትጅያይት እካን ትመልክ። ሰበት እሊቱ ህዩ ዋሽንግቶን ዲብ ሶማሊ መጸተይ እካን እግል ትርኩብ ሌጠ እንዴ ኢጉብእ ለተሐሰቡ ምናተ እግል ክሉ ሚናት ሶማሊ ኪሰማዮ፡ ሚርኩ፡ መቃዲሾ፡ ቦሳሶ፡ በርበረ ወዘይልዕ እብ ከማሉ እግል ትጽብጥ ዐሽም ዛይድ ቡ። አህምየት ዋሽንግቶን ወዐሽም የም ለትወለደ እንዴ ኢጉብእ፡ ምን በዲር ለጸንሐ ወዲብ መደት ሐርብ ብሩድ ፍንጌ ዋሽንግቶን ወሞሰቡ ዲብ ትወቀለት ርሽመት ለበጽሓ ቱ። ንዛም ስያድ ባሬ ህዩ ውላድ ሶጌት ወኩብ ዲብለ ድድ ኮሎኔል መንግስቱ ሀይለማርያም ወድዩ ለዐለ ሐርብ ምሰሉ ሰበት ኢብጥረው፡ ዲብ የም 13 ናሽምበር 1977 እግሎም እንዴ ጠርዘ ምሰል አሜሪካ ዕላቀት ከልቀ።

2. እዳረት አሜሪካ፡ ለዲብ ሐንቱ ወዘር ካርጅየት አሜሪካ ለዐለት ኮንደላሳ ራይሱ፡ “እግል ድወል ብሔራት ዐባዩ ወምግባይ አፍሪቀ ለከምክም ‘ቀር አፍሪቀ ዐቢ.’” ለቴለተ እስትራቴጂየት ምን ሐዲስ እት ፍዕል እግል አውዐሎት ትጸገም ህሌት።

3. አሜሪካ፡ እምበል ለጉብኣ ልግበእ መራቀባይ፡ እብ ገበይ ሸሪካት ብትሮለ እንዴ ወዴት ሶማሊ እግል ትጽብጥ ዐሽም ዛይድ ህለ እል። እግል እሊ መጃል እሊ እንዴ አሸረት ጀሪደት “ ሎሰ አንጀልስ ታይምስ” ዲብ ናይ የም 18 ጃንዋሪ 1993 ጥብብተ፡ አርበዕ ሸሪካት ብትሮለ ሸፍፍን፡ ሞኩ፡ ሞሮኮ ወፍሊፕስ ዲብ መደት ጀነራል መሐመድ ስያድ ባሬ ዲብ ሶማሊ ናይ ተዕዲን ብትሮል በክት ራክባት ክምሰል ዐለዩ አፍሀመት። ጂኦሎጂያይ ብሐሰ ክምሰል ለሐብሩ፡ ዲብ ሶማሊ ቅያስ ብዙሕ ብትሮል ክምሰል ህለ ልትአመር።

እብ ተውሳክ ዲብ ሐንቱ ምድር ሶማሊ ዩራንዩም፡ ጋዝ ጥቢዕት፡ ሐጸን ወብዕድ ብዙሕ መዓድን ቃሊ ክምሰል ህለ ኤለክትሮኒካይት ሸከት መርከዝ ስለል አሜሪካ (CIA) ተሐብር። ሰበት እሊ እዳረት አሜሪካ እግል ክሉ አሕዳስ ሶማሊ ዱቅሪ ልግበእ ወእብ ወለት ገበይ ምን ምድር ወአርዛቅ ሶማሊ ብጽሐት እግል

ትርኩብ ተዐምበልብል ለዐለት ሕክምና ኦቶብዩ እንዴ ወዴት እግል ትራቅቡ አላፍ አሰባብ ምንመ ትክልቅ ለሰራክር ኢኮን።155

4. አሜሪካ፡ እግል ምን ከሊጅ ዐረብ ወፋርስ አስክ ድወል ምውዳቅ ጸሓይ ብትሮል ለጸዐን መራክብ ለለሐልፍ እቡ ማያይ ከዋ እንዴ ራቀብት፡ ምን ለጉብኣት ትግበእ ጀሀት መሰሊት ለኢጉብኣ እቱ መብቅያይ አሕዳስ እግል ዕቅብት ዲብ ምህም ወቅት ህዩ ዲብ ረኣሰ ብዕዳት ድወል ምውዳቅ ጸሓይ ክምሰል ናይ ጨቅጥ ወረቀት እግል ትትነፈዕ እቡ፡ እብ ትሉሉይ ትጸገም። አሜሪካ ዲብ ክል ምዕል 20 ሚልዮን በርሚል ብትሮል ትትነፈዕ እት ህሌት፡ ምን ምድረ ሳኪን፡ ዲብ ክል ምዕል 8 ሞልዮን በርሚል ለኢሊሐልፍ ብትሮል ተ ለተአፈግር። እሊ በህለት ህዩ ዲብ ክል ምዕል 12 ሚልዮን በርሚል ምን ካርጅ እግል ተአምጽእ ቡ።



ዲብ መደት ሐሜር ህዩ ናይ አሜሪካ ዲብ ናይ በረ ብትሮል መተንካብ በርናምጅ እግል ተአሰፊ ቱ። ሰበት እሊቱ ህዩ ምን አዜ እንዴ አሰተብዳት ብትሮል እግል አድመናት ማያይ ከዋ እግል ሕፍዘት ወዕቀብት ትሸቁ።

ዲብ ደንገቡ፡ እሊ ዲብ ምድር ሶማሊ ፍንጌህ እብ እዳረት አሜሪካ ወኦቶብዩ ለልትሰደው ሶማልዩን ጀሃት እት ጉብእ ለጸንሐ ስያሰያይ ወዐስከርያይ በአሱ፡ ዲብ ከርስ ናይ መንጠቀት፡ ቃረት ወእድንዩይ ዕምር ለቡ ቱ። ዲብ ክሉ መጃላት ወደረጃት ህዩ ናይ ተእሰር እግል ለህሌ እሊቱ። እሊ አዜ ለህለ አከይ-መቅርሕ ዲብ ሶማሊ ህዩ ዲብ ቀበትለ አሜሪካ እግል እዳኒ ምን ሐዲስ እግል ወጀሆት፡ ሐቅ መርሐለት ሐርብ ብሩድ ለተበዐተ እስትራቴጂየት ለልትረኤ ቱ። አሜሪካ እብ ሕጌ መጋብሀት እርሃብ እስትራቴጂየት እት ፍዕል እግል አውዐሎት፡ እግል

ሐደስ 11 ሰብተምበር 2001 ምን ፕራግማቲካይ መሰሉልየት ወደሚር ወኪን አንተሀዘቱ። እሊ ናይ አሜሪካ እስትራቴጂየት እሊ፡ እግል እዳኒ፡ ዲብ ሸከረትለ መሻክል እግል ዋለዮተ ክሉ ጅንሰ ዐዋምል ሰበት ሸምል፡ መሻክል እንዴ ኢሙጽእ ሐቅመ ልብ ኢከሬን እቱ ለዐቤት ብቅት እግል ልሰብብ ቀድሮ። ዲብለ ሐቅ ከም ጅህድ ዲብ የም 22 ማርስ 2010 እብ ገበይ ምጅልስ አሜሪካ “ቃኑን ተሰቡሕ ደሐን ዓፍየት” ለሳደቀ ርኢስ ባራክ ኦባማ እግል ትተንክብ ለልትቀደር ኢኮን። ለቀድየት እብ እስትራቴጂያይ ናይ እቅትሳድ መሳልሐ ናይል ዲብ አሜሪካ ሰልጠት ለትጽብጥ ቅወት ለልጸባጥ ህዩ ብዕድ ምሽክለት አለቡ። እዳረት አሜሪካ እግል ሶማሊ እግል ራቀብት እብ ትሉሉይ ዱቅሪ መትኣታይ እግል ቱዴ እብ ገበይ ወኪለ ላተ ኦቶብዩ ዲብ ሸቄ ጸንሐት።

መትኣታይ አሜሪካ ዲብ ሶማሊ ቀዳማይ፡ አሜሪካ ዲብ መደት

እሊ ታሪካይ በክት እሊ እግል ትርኩብ እብ እንትብህ ትራቅብ ለዐለት ኦቶብዩ ህዩ ወኪለተ እግል ትግበእ ሐሬት። ለሀደፍ ዲብ ረኣሰ ሶማሊ መርባት እግል አቅሰናት ሌጠ እንዴ ኢጉብእ፡ ሶማሊ እንዴ ጸባጥክ እግል መሳልሕ አሜሪካ ክምሰል ትክድም እግል ዊደታ ቱ። ለምን ናይ አሜሪካ አጃንደት ለኢልትፈንጉ ንዛም ኦቶብዩም ሀደፍ ክምሰል አሰልፍ ለሸርሐናሁ እግል ሶማሊ ፈንጠሮትቱ ለዐለ።

ካልኣይ፡ እዳረት አሜሪካ፡ ለዲብ “መ-እተመር ዕሪት ወጠን” ዲብ ጅቡቱ ዲብ 2000 ለተአሰሰት አሰልፍ ለሸርሐናሁ ሕክምና ዐብደሊቃሰም ሰላድ ሐሰን፡ እብ ዕንታት እቤቱ ልርእዩ ለዐለ። ለእግል ሕክምና ኦቶብዩ ዲብ ሰንት 2001 ዲብ ሐንቱ ዕዛል “ምጅልስ ዕሪት ወሐደሶት ሶማሊ” ለከምክመቶም መናቢት ሐርብ ቱ ህዩ ለትሰዴ። ዋሽንግቶን ድድ ወጠኒያይት ሕክምና ሶማሊ እግል መናቢት ሐርብ ለተህይብ ሰዳይት “እግል መጋብሀት እርሃብ”



ዲብ ትብልቱ ዲብ ተአመሰምሰ ለጸንሐት። ምን መደረት ለምሰምሰ ትትመክረህ። አሜሪካ እግል እግል እሊ ሐቅ ወዴቅ ሶማሊ ዲብ ሰንት 1991 እግል ሰፍል ኢነት ለተአሰሰ ወዲብ ደሚር ሸዕብ ሶማሊ ሰእየት ለአሰቀቀት ወጠንያይት ሕክምና ሶማሊ እግል አፍረሶት ለሸቁ መናቢት ሐርብ ሶማሊ እግልሚ ትሰደዮም? እሊ ናይ አሜሪካ ሀገራት እሊ እግል ጉብኣት ትግበእ ጀሀት እግል ልቅሸሸ ኢቀድር። ክምሰል ልትአመር ርኢስ ሶማሊ ዐብደሊቃሰም ሰላድ ሐሰን፡ እግል ጉብኣ ልግበእ ወራታት እርሃብ በክት እግል ክልኣት ሰላም ወመሰከብት ወአምን ዲብ ሶማሊ እግል መዲድ፡ እዳረት አሜሪካ ሕክት መናቢት ሐርብ ትሰዴ ዐነዲ ሕክምና ሶማሊ እግል አተረዶት ሰዳይተ እግል ትቀድም ጣልብ ዐለ። ምናተ ሴምዓይት እዘን ኢረክቡ።

ሳልሳይ፡ እዳረት አሜሪካ “ሶማሊ ደማን ለቡ መሐብዲ ናይ

መርዕደት ዐናሰር ጋብኣት ህሌት” ዲብ ትብልተ ለትሸኪ። ለዲብ ሰንት 1998 እግል ሰፋራት አሜሪካ ዲብ ኬንዩ ወተንዛንዩ ለደመረው ናይ እርሃብ ዐናሰር፡ አስክ ሶማሊ ክምሰል ሀርበውቱ ለተሐብር። ለእብ አሜሪካ ለልትሐዘው ሰለሰ ናይ እርሃብ ዐናሰር ህዩ ፊድል ዐብደሊ መሐመድ ምን ጀዘረት ኮሞርሶ፡ አቡ ጠልሐ ሱዳን ዲብ ሰንት 2007 እብ ኢተአመረ ቴለል ለትቀተሉ፡ ምን ሱዳን፡ ወሳክ ነብህ ዲብ ሶማሊ ዲብ ሰንት 2009 ኣብ ናይ አሜሪካ ናይ ጥያራት ህጃም ለትቀተሉ ወድ ኬንያ ቶም።

ራብዓይ፡ አሜሪካ ዲብ መደት ርኢስ ጆርጅ ቡሽ ዲብ ሰንት 2006 እግል መናቢት ሐርብ እንዴ ሰዴት እግል ካልኣይ ወቅት ዲብ ተማሰ ሶማሊ ትሸመመት። ዲብ እሊ ናይ ካልኣይ ወቅት ጀርቢህ ህዩ “ እግል ብልሰት ሰእየት” እንዴ ኢጉብእ፡ እብ ገበይል ምን አምዕል ወዴቅ ርኢስ መሐመድ ስያድ ባሬ - 1991 - ምልክ ጥሉቅ ዲብ ሶማሊ ለአሰቀቀው መናቢት ሐርብ እንዴ ወዴት፡ “እግል መጋብሀት እርሃብ” እብ ልብል ሰቅራት እግል ሶማሊ አስክ ደማር እንዴ በደለት እግል ሸዕብ እት ክለ እዳኒ ክምሰል ልትሸዕተርቱ ለወዴት። ለ “ዲብ ወጠንዮቱ ለእነብር” ለቤለ ምዋጥን ህዩ አረይ ድብር፡ ሰፍራ፡ ዘማቱ ወርዕብ ጉብኣ። ምር ምን ለትዐጅብ ህዩ ሰሓፊት “ኒውዮርክ ኒውሰ ታይምስ” ክምሰል ቴለቱ፡ እዳረት አሜሪካ እብ ገበይ መአሰሰት ስለላህ (CIA) እግል መናቢት ሐርብ ዲብ ሐንቱህ “ገሊድ አከዶት ሰላም ወመጋብሀት እርሃብ” ለትሰመ ስያሰያይ ወዐስከርያይ ተንዚም ክምሰል ነሽጦ ወዲሁቱ ለዐለ።157 ፍንጌት እግል ኢሊአሙጽእ ህዩ አምኣት አላፍ ዶላራት ፈግረ እግል። መትመራምራይ “ሐሽመት እድንያይ መሻክል” ጅን ብሪደር ጋሰት ዲብ የም 7 ጃን 2006 ዲብ ከተባዩ፡ እሊ አዜ ለህሌት ስያሰት አሜሪካ አተላላት ምንገብእ፡ እግል መሰለሐት አሜሪካ ወድወለ መንጠቀት ዲብ ብቅት ላትካሬ ክምተ ፈደሐ። መናቢት ሐርብ እብ እሰላምዩን ሰበት ትቀለበው ህዩ እግል ፈሸል አሜሪካ ዲብ ሶማሊ ለለርኤ ክምቱ ህዩ ሐበረ።158

መናቢት ሐርብ ሶማል፡ እብ ዲብ ምን ቅያስ ወለዐል ዲብ ስያሰያይ ሚዛን ሶማል ምህም ዶር ለቡ ቅዋት መሓክም እሰላምየት ለለአክጅል ፈሸል ክምሰል ሳደፊዮም፡ ስያሰት እዳረት አሜሪካ ናይ ሶማሊ አጃንደት ዲብ ፍዕል እግል አውዐሎት ፈሸለት። ምናተ እዳረት አሜሪካ ስያሰት ወአፍካረ ሕክት ሰቡሕ፡ እግል ኤረትሮፕ፡ የመን ወሰዑድዩ እምበል ለጉብኣ ልግበእ እሰባት፡ “እግል መሓክም እሰላምየ ዐስከርያይ ሰዳይት ሀቡዩ” ዲብ ትብል ናይል ሳደፊዮ ፈሸል አረይ እግል ቱደዩን ጀረበት።



ሽወብ ለሕገህ ሰው-ረት ኤረትርዮ



መደብረታዊ ግድለ ተሕረር ኤረትርዮ እብ ስለሕ ሙናድል ሓምድ እድረሰ ዐዋቱ ወመልሂቱ። ምነ ሰው-ረት ዐለነዋተ ንዕዩ ኦቶብዩ ትንፋሰ ከልኦቶም። ክሰ-ሰን ሐቀለ እት 26 ሰብተምበር 1961 ዲብ ኦዳል ለገብአት ኦዳይት መዕረከት ሰው-ረት ኤረትርዮ ወእስትዕማር ኦቶብዩ። ዐሳክር ኦባይ ኦሰርም ምነ ተሪፍ ኦበው። እብ ከርዶናት ኩሉ ረክሱ ዕርፍ ሰእነው። ሽወብ ሳኪን ሰድዮም ወረድኦም ዐለ።

ሐቲ እግር እት ዐድ-ሰን ዐድ ለሀብዮምተ እንዲ በልዐው። እት ወደግ ዲብ ልትሰለው። ምን ዐድ ሀብክ ለትብገሰው ክልኦት ሽወብ እት ልሰው መጽእምም ረክው። ሓምድ፡ ሰብ ደሐን ክም ኢኮን ሰበት ፈሀመ። እንዲ ትላክ ትሰክለዮም። እት ድጋሆም ፖሊሰ እንዲ ኦተው። ደለ እናሰ ቱ እት ከሌብ ኦሽዋክ ክም ደብኦም። ሀቶምም እንዲ ኦመሰመሰው ክም ፈግረው ሐበረው።

እት ከሌብ ድብኦም እት እንቶም። ገሌ ዓቅላም “የሀው፡ ለእንሳኑ እበ ሐው-ረተ እባዩ ትፈረረት። ምን እሉም እንርእዮም ለሀሌን ሽሑሕ መጋቦም። ምን ሀለ እንዲ ሰዐ ለልኦት።” እት ልብሎ ሀግዩ እብ ምስጢረ እት ልትሃገው ክም ሰምዐምም። እግለ ፖሊሰ፡ “እንሰ እብ ሐው-ረተ ሰበት ሀሌት እግል። ከረቸ እግል ኢልብልዐ እግል ነግዶረ ኦጅዞ እግል” እንዲ በለው ፈግረው ከመጽእምም። ከረ ሓምድ እለ ሐብሬ እለ ክም ረክበው እብ ኦድዮ። ኩጃር-ኩጃር ለልትባህል ደብር ፈግረው ከምን ኦባይ ኦራመው። ደኦም ፈጅር ሐቲመ እት ባካት ድጋ ኦልገዳን እት ኦባይ ትከረው። እብ በክት እት ኦካን ብርርሐት ቀደም እትቶቶም። ገርሀቱ ለዐቅብ ለዐለ ምን ቅባል ለፈረገዮም ነፈር። እንዲ በድረዮም፡ “ቅሩብ ኦባይ ሀሌኩም” በለዩ እግል ሓምድ።

“ከደብር ደብሎቸ ገብእ ንፍገር” ትሰክለ ሓምድ። “ምፍጋር ብዕደት ለሀብኩም ድኢኮን። ስጋደት ፍገር ወትከረው። እለ ምድር ምን

ኦልገዳን ኦልክ ኦርቲገ (ባካት ደብል)። ኦልክ ግፋቱ እብ ኦባይ ምሉእ ሀለ” በለ ለሽወብ።

እት ከርዶን ኦትዮም ሰበት ዐለው ለኦር ሕርዮም እንዲ ደገሽክ ፍግረት ሌጠ ዐለ። ሓምድ እግል ጅምዐቱ፡ “ክርን እንዲ ኢትወዳ ትለውኒ” በለዮም። ኖሱ እት መርሐም ሀይ። ኦልክለ ደብዕ ጋምል ለዐለ ዲቡ ባካት ኤሽንኪት ወግፋቱ ለከሬ ሕሊል ኦፎገ ትብገሰ እባም። ኦዳው-ሕዮት እብ ምግብለ ድማኖም ወድገለዮም ለዐለው ዐሳክር ሕሊል እንዲ በትከው። እብ ሰላም ተዐደው ወግፋቱ ኦተው። ማናተ እብ ሐዲሰ እት ፍንጌ ኦባይ ኦቲሆም ለጸንሐ ቤት ሐሰን ወዐድ ከለፈን ትክመመው።

እብ ፍንጌ ክልኦት እሉም ድጋ እት ልሂር። ምርት ምን ዐድ ከለፈን ለትብገሰ በዐል ገመል ትቃብሉዮም። “ኦገት ገይሰ?” ክም ትሰክለው “እንቱም ሀይ ኦልክ ኦገት እንቱም?” በለዮም። ሰበት ፈረገዮም ድንገጽ ምኖም እት እንቱ።

“ኦልክለ ልትወጤ እግልን ምድር እብለ እግል ንሕለፍ”

“ድረር ኦባይ እግል ትግብኦ! እትሉም ክልኦት ድጋ።

ኦልክ ደብር ቶንቶን ምን ትፈግር ለሐይሰ” በለዮም።

ሀቶምም ግፋቱ ድገለዮም እንዲ ሐድገው። ደብር ቶንቶን ፈግረው። ጽምኦም ዐለው። ማይ ምን ጋነሐው ሐፋር ገናይዝ ለሐንፈለዩ ሕፈር ረክበው። ሐፋር-ገናይዝ ማይ ምን ኢልሰኤ ወይሐፍረ። እንዲ በለው ምን ሐፍረው ዓን ማይ ሰበት ፈረቀት እቶም ኦልክ ረወ ሰተው ወፍሬ ኦውሐ እንዲ ተኦወከው ዲብ ዓረፈው ከሄራርም ኦተላለው። እት ጌሪሪ ለልትባህል ድጋ ሀይ ሓምድ እግል ሽወብ እጅትመዕ ወደ።

“እት መደት ሕክም እንግሊዝ ሽፍታይ እትባህል ዐልኮ። ዮመቱ ሳኪን ጅብሀት ኦተሕረር እትባህል። ወእለ ሰሜት እለ ናይ ሓምድ እንዲ ኢትገብኦ። ናይ ሽወብ ተ። ጅብሀት ብሶት ተ። ተሕረር ሀይ ሕርዮት። እግል ሕርዮት ወጠኩ ለልኦትሽሀድ በሀለት ተ።

ሕርዮት እብ ደም ወእስትሽሃድ ወእኪት እንዲ ከሀልክ ትመጽእ። ኦኪ እግል እስትሽሃድ ዱሉዮም ለሀለው። ኦልክ ኦክር ዐውቱ እት ንዳል ለሰምዶ ምስልዩ ሽባብ እግል ልትለውኒ ሰዳይትኩም ሐኪ ሰበት ሀሌኮ። ወ-ላድኩም ሰጅዮ ወእግል ሐሳዮም ሓርዮም።

ኦነ እት ንዳል ምንለ ፈገርት ዲብ ኦልክ ሃድል ዮም ምን ተሰነይ። ሀይትተ ወግርንቶ ለትብገሰው ፖሊሰ። ጅዋሰሰ ሰበት ረክበው ቱ ደርብዩ ገብኦ ለሀለው። ሓጅት ሐቲ ሀሌት እግል ትውደሕ እግልኩም ለሐዘዮ። ፖሊሰ ሐብሬ ዋድሐት እንዲ ረክበው። “ሓምድ እተሃ ሀለ” በለውኩም ምን ገብኦ። ነፍሰኩም ኢትካዮር። “ምስልን ትመዩ ወኦኪ እብለ ጌሰ” ቦሎም። እብ በለ-በለው እት ልትመርሐ መጽእው ምን ገብኦ ሳኪን። “ኢረኤኑ። ኢሰምዐነ ወኢኦኦም” ቦሎም። ለልሐሴ ሀይ ወይሉ! እብ ፍንቱይ ዝር ኦልክ መዳይን እት ገይሱ። ተዩልኦን እግል ፖሊሰ ኦልክለው ምን ገብኦ። ጅዛሆም ሞት

ወርዕዮይ። ሐቆ ሐሰ ርሐ ሞት ፈርደዮ። እግል ለሙት ድኢኮን። እግል ልቅተልመ ኢቀድር። እሉም ኖሱ ብዙሕ ለልትፈርሆ ኢኮን። ለልኦፈርሆ ሰለሰ ቶም።

ስልፋይ- ምን መልሆም እንዲ ጅርጠ እት ኦባይ ለሰልም ተ። ክምለ እት መደት ሽፍትነት ክም ምራዶም እግል ልዝመቶ ወለዐምጽ ለልሐዙ። ሳኪን ኦኪ ኦርደት ለጨብት እቶም ሰኪይ እንቡታም ሀለው። እሉም ወእሉም ለመሰሉ ኦንፋር እግል ሄራርን መሐልክ እንዲ ገብኦው ኦቲ። ምስልን ለልትሳደው እሉም እንዲ ፈድሐው ኦዘ እግል ሊደው ለቀድሮ ኦባይም ሽወብ ቶም።

ካልኦይ- ምስል ኦባይ ዕላቀት ለቡ ወረሽወት ምን ረክብ ኦባይ ምን መግይነ ሐር ለኢልብል ሼኽ ተ። ሼኽ ለገብኦ ነፈር ናይ ልቡ ለልሀይቡ እሙን። እብ ሽወብ ካብር ተ። ሀቲ ለወደዩ ኦኪይ መዋዲት ሳኪን ሰቲር ሰበት ገብኦ። ጃሱሰ ክም ተ እግል ተኦሰብት እቲ ሰዳድ ተ። እብ ኦባይ ለትዝመ ሼኽ። ምስልክ እት ልትሃጅክ። ለልድዔ ወልድሕር እት ልትመሰል ሀገሊትክ እት ኦዳሁ እንዲ ከትቡ። ምንክ ክም ትፈንተ እት ወረቀት ሰጅሉ።

ካልሳይ- ሽቃይ ሕኩመት እብ ፍንቱይ ደባዋ ፖሊሰ። እሉም ምስል መሻይክ ሰበት ለኦጅተምዶ። እብ ቀላል እት ሕኩመት ሐብሬ ለልኦልፎ ወለኢልም ሕት ቶም። 40 ብር ለማሀዮቶም ርትብት ለኦልዮም ፖሊሰ ሳኪን። ምን ሽወብ ሰበት ቶም። ምስል ኦባይም ለልትዐለዮ ኢኮን። ሀቶም መሳኪን ቶም። ሰበት እለ። እሉም ኤዘዮት እግል ንትኣፈዝ ምኖም ወጅቡ። እግል ኖሰኩ'መ ተኣፈዘ። ንዳልን ክቡድ ተ። ሕነ ንትብገሰ ሀሌ። ለተሌነ ሀይ ምን እለ ኦኪ እንዲ ኦንቡተ ለዐሬነ” ለልብል ሽሑሕ ሀቡ።

ለፊራርታት። እብ ኩሉ እትጅሃት እንዲ ከርዶንክ ሃጅዋቶም ሰበት ዐለ። ለሙናድሊን ለበዝሐ ኦውካድ እት ጸለምት ድኢኮን። እት በርሀት ተወዝ ልብሎ ደዐለው። እንዲ ትጅብረው ምን ልትሐረት ሀይ። ኦሰርሰ ማርኣይ እት ካይዶ እብ ኦር ሴር ልሂር። ኦሰርም እግል ለኦብዱ ምርት ምነ ሓርዮም ሐጽር ናይ ዐቅብ ኦው ለገብኦ ዕጩይ ቀዋሬታት ለቡ ልሰሕብ። እስኢኖታት ገጽ-ግራሁ እንዲ ባለሰው ለቡ። እት ምግንዝ እግል ኢልትመልሐዋ ምኖም ወሰዐይ እግል ኢልክልኦም። ምን ረክቦ እብ ሽለትት ኦው ሰራክ። ወምንኢትረክቦ እብ ልሕጽ። እት

እግርም ሽብ ክም ልብል ለኦሰፋ። እብሊ ሀይ ኦባይ እበ ጌሰው ሕኔት ለዐርዮም። ኦልክለ መጽእው ምነ ምድር ክም ገይሰ ወበዔ ልትቃርሕው። እንክር ግብለት ሀለው እት ልትባህሉ። እብ ቅብለት ልትሸረቦ። ልሂር ማሰዮም እንዲ ዐለው እት ቀወሺ ደል ልሸኢን። እብ ሰልሰሰ-ኦርኦርብዕ እት ቅሩብ ሕድ ደገሊት ልትፈንጠር። እት መጽእው ዐድ ዐደዶም ኢልኦሰኢሉ። ወምን ለኦሰኢሎ እብ ኦርብዕ-ሐምሰ ዕጽፍ



ለኦበዝሕው። ለዐድመ ኢልትሰኢል። እብ ወግም እት ኦካን ሰትርት ነብራሆም ለኦመጽእ እሉም። ሀቶም ሀይ ክም በልዐው ጸባይዮም እንዲ ዐቅረው ኦውመ ምናድሊን ብዝሓም ክምሰለ በልዐው እግል ለኦተምሎ ለጸባይዮም ዳፋት። ወለጠወሺ እንዲ ለሐሰው ለሐዳጉ። እለ። ኦንሰለ ደገሊት ምልዐል ቅድረተን እግል ለኦብሸለ ጅብረን ምንመ ዐለ። ሕዳንክ እግል ኢልትካሸሕ ገብኦ ለዐላቱ። ፖሊሰ እት ኦሰርም ‘ሓምድ ረኤኩም’ ደል ልብሎ። ‘ማሌ ምሴት እትለ ትደረረ ወእትሊ ቀነብዮትን ትመዩ ልቡሎም። እት ካልኦይ ዐድ ክም ልትሰኢሎ ክምለ ቀዳም ልቡሎም . . . ለፖሊሰ ‘ክም ሓምድ ቶም ለሀለው’ እት ልብሎ እሰው ሓምድ ክም ልትካረፎ በዔ ምኖም ዐለ።

ፈጅር ሐቲ እት ሕሊል ሞገራዬብ እት ባካት ዐድ-ገናድ። ፈደደ እት ልትባህል ወደግ። እት ዔለ ሐቲ ሐሊብ እት ሰቲ። ሽወብ ለሀብምም ተን ክልኤ ጠሊት እንዲ ሐርደው እት ማዱ። ዐሳክር ኦባይ እት ልትሐብር ወለኦትኦሰር ጽብሓት ምድር ዐድ-ገናድ ኦተው። እምበል ሐ-ዳም ለረኡዮም ወድ ዐድ ደዐለ። ፖሊሰ ሀለዮቶም እግል ኢልትደሌ እንዲ ትግፈገው ክምለ ክል-ደል ለወደዎ እግል ሰብ እት ከሌብ ኦሽዋክ ደብኦምም። እግል ኦንሰ ሳተ “ኦገት እግል ኢሊጊሰ” እንዲ በለው። ሕሰረን ኢወደው።

ዲብ ገጽ 10 ልተላላ...



ክልኤ ፈሰለት ኦባይ ሀለዮ። ኦናመ ምን ዐድ ከለፈን ኦልክ ቤት ሐሰን ልኡክ ሀሌኮ። ሀለዮትኩም እንዲ ኦመረው ሓምድ ኦልክ ምውዳቅ ጸኣይ ሐቆ ጌሰ ይእንጽብጡ ልብሎ ሰበት ዐለው። እብ ሽፋግ

ቲ። እለ እግል ኢብለኩም ለቀሰቤኒ ጋር ሀይ። ለንዳል ናይ ክለነ ሰበት ገብኦ ተ።

ጅለ መሰለሐቲ ድድ ሽወብ ወንዳል እግል ሕኩመት ለልሐሴ ጃሱሰ ተ። ሐረሰታይ ልግበኦ



ግማማትና ወርሃዊ ምርት

ተማመት ክልቀት ገሌ ሸይ ምኑ ዶል ተአገምም ከምን ሐዲስ ምኑ ትሰክል ዲብ ህሌነቱ ለልትፊሆሎክ። ክሱ ድድ ጠቢባት አው ክልቀት ለገብሽ ወራታት። ዲብ ደንገብ ምድረት ዲብ አዳም ወዲብላ ነብር እቱ ድዋራት እግል ሊዳ ላብድ ቱ። እብሊ ህዩ ዲሙ ምሰል ክልቀት እንዴ ትመሳሕን እግል ኒጊሰ ወጅብ።

ሐርሱ አግደ አርዛቅ ምድር ዲብ ተአንትህዝ ዲብ ትርብት አርድ ለገብሽ ወራታት ሰባት ቱ። ዝያድ ለገብሽ ልግብሽ መጃል። ምሰል ጠቢባት እንዴ ትመሳሕን እግል ልሂርር ለቡ ብትር ቱ። ምናተ ወራታት ሐርሱ እንዴ ኢተህይቡ ለኢሊህይቡ መጃል ሰባት ቱ። ለዲብ ትርብት ለልትዘረእ አዝረኢት ልግብሽ ወምላዕል ምድር ለገብሽ ወራታት ተዋብ እንሱሱ። እብ ዘበናይ አግቡይ እቱይ ለለአዘይድ አብሳር እግል ለህሌ ላብድ ገብሽ። እብሊቱ ህዩ ዐለም። ለምን ወቅት ዲብ ወቅት ዲብ ዘይድ ገይሰ ለህላ ዐሽም ኔብረተ እግል ተአርቱ። ዲብ ትሉሉይ ብሔሱ ወድራሳት እግል ትንበር ለትትቀሰቡ።

ቀመማይ ሸፍር ወመዳፈዐት ባልዲን ወሕማማት ህዩ። ገሌ ምን እት መጃል ሐርሱ እብ ምሰዳር ዐባይ ለልትዐደወ አብሳር ቱ። ቀመማይ ሸፍር ወድድ-ባልዲን ላኪን አክለ ለህዩበ መናፍዕት። ዲብ ዓፍዮት አዳም ወድዋር ሰብብ ለህለው ምድረት ቀላል ኢኮን። እብሊ ህዩ። ዮም ጠቢባታይ አግቡይ ሐርሱ (organic farming) ዓማት እድንያይት መስለላት ዲብ ገብሽ መጃል ህላ።

ለእግል መደት ረያም ለሂረረ እድንያይ ህደፍ “አከዶት ደማንት ነብረ”። ዲብ “አከዶት ደማንት ቅዝ ለብ ነብረ” ምን ልትብደል ሐድ ዋዲ ህላ። እሊቱ ህዩ አዜ ለፈህም ወለህደፍ ደሐን ወደማን ቀደም ክሉ እንዴ ትረተቡ። ዲብ “አከዶት ደማን ለብ ነብረ ቅዝእ” ብዱል ለህላ።

ዐድነ ኤረትርዮ። ልሰዕ ዲብ አፊት ዘበናይ ሐርሱ ምንመ ህሌት። ምድረ እብ ቀመማይ ሸፍር ወባልዲን እንዴ ኢልትመንክል። ዲብ እለ ሐዳስ መርሐላት ፈልሰፊት ሐርሱ ተአቱ ህለዮተ በዐል በክት ወድዮ። ሰበቡ። ምሰለ ህለ እግለ ብዙሕ ለናሱብ

አብካት። እት ዶሉ ናይ ሐርሱ አብካት እብ ደማን ወመርህዮ ለብ ገብይ እንዴ አንተህዘት አርወሐተ እንዴ ቀድረት እግል ተሰዲር ለአመመ ዐ-ፋይ እቱይ ሐርሱ እግል ተአፍሬ ዲብ ራቴፅ መርባይ ትሂርር ህሌት።

ውዛረት ሐርሱ ምሰል ውዛረት ርዝቅ በሐር ወእዳራት እብ መትግምን። ምን 2021 እንዴ አሰተብዳት። ጠቢባታይ ሸፍር ወድድ-ባልዲን እግል አፍረዮት ዐባይ ወምህም በዳራታት ልትነሰእ ክምሰል ህለ ልትአመር። እለ ዲብ መጃላት ሐርሱ ዐድነ ሰው-ርያይ ተቆዩር እግል ተአምጽእ ሰእዮት ለትገብሽ እቱ በዳራት። ዲብ እለ ምህንት አምር ወንዮት እብ ስም ሸባብ ወሰብ መቅደረትቱ ልትዋሌ ለህላ።

ሐቱ ምን እሉም ለእምቤሎም ሰብ መቅደረት። በዐል መቅደረት ዕልም ብቅል ላተ ሻቡት አድያም ርዘኔ ቱ። እንዴ አትሌነ ህዩ። እት አዳላይ ጠቢባታይ ሸፍር እንዴ አተንከብኩ። ምሰለ ለወዳናህ መቃብላት እንቀድም።

ሰኣል። እለ ሰነዖት ጠቢባታይ ሸፍር ለልብል በርናምጅ እብ ከአፎቱ ለትብገሰ?

በሊሱ። መብገስ ናይ እለ ሸቅል። ዲብ ሰነት 2018 ዲብ ጠቢባታይ ሐርሱ ለረከዘ። ዲብ ጃፓን እግል 9 ወሬሕ ለነሰአክወ ተአሂል ቱ። ምር ምን እብ ፍዕል ወሸሬሕ ለነሰአክወ ምህር። እብ ከአፎ ዲብ ድዋራትክ እግለ ህለ አሸዮእ እንዴ ትነፈዐክ ዲብ ጠቢባታይ ሸፍር እት ትብድሉ ዲብ መዓል ሐርሱ ክም ልውዕል ትትነፈዕ እቡ ለልብል ቱ። ለምህር እብ ዋጅብ እንዴ ታበዐኩ ዲብ ዐጃ ክምሰል አቅብልኩ አህምዮቱ ሰበት ትረኡተኒ። እግለ ከሰሶም መሰኡሊን ሐበርኩ። ሐቆ ገሌ ወቅት ህዩ። እግል እለ ውብዕድ ለትክምክም ወጠንያይት ልጅነት ሰበት ተአሰሰት። ዲብ ፍዕል እግል ነአውዕሉ እነቡታም ህሌ።

ሰኣል። ‘ሰነዖት ሸፍር ጠቢባት ምን ዲብ ባካትክ ለህለ ለትፈናተ አሸዮእ’ እምብል ዲብ ህሌነ ሚ በህለት ቱ?

በሊሱ። ሰነዖት ጠቢባታይ ሸፍር ምን ለትፈናተ አሸዮእ እብ ደቡሰ ወሬሸት እግል ልዳሌ ቀድር። እለ አግቡይ ሸቅል እለ ዲብ ዐድነ ሐዲስ ምንማ ቱ። ዲብ ድወል አሰዮ

ክምሰል ከረ ጃፓን። ግብላት ኮርዮ። ህንድ። ፊሊፒንስ ወለመሰለን ድወል ለልትነፈዐ እቡ እት ገብሽ። ዲብ ዐለም ህዩ እብ ኮርያይ ጠቢባታይ ሐርሱ (Korean Natural Farming) ልትአመር። ገሌ ምኑ እግል ንሰሚ።

Indigenous Microorganism (IMO)። እብ ኪማኤያት ለኢኮሎጂ ትርብት ክምሰልሁሙ ዲብ ደበዕ እብ ብዝሐ ፅጌይ ምን ቡ አካናት ነአይሽ እብ ዕን ለኢልትራኤ ማይክሮባት አው ሕያያም ምን ትርብት እንዴ አከብኩ። ምን 1 አሰክ 4 ለትፈናተ አግቡይ ለሐልፍ። ክምሰል መትሻፈጊ እግል ሸቃይ ኮምፖስት ቀመማት እግለ ሸለሐት ትርብት ዲብ ዳይመት ሓላተ ዲብ ብልሰት ዶር ዐቢ ለአገዳ።

ምን ቀጠፍ ለልዳሌ ፊሻይ ሸፍር። ምን ሸትል እንዴ አሰተብዳክ አሰክ ወክድ አቀጥፍላ ብቀላት ልትረሸረሸ።

ምን ለትፈናተ ፈርያት ለልዳሌ ፊሻይ ሸፍር። ምን ወክድ ዕንባብ

በደሎት በዳራት ትትነሰእ ህሌት።

ሰኣል። ጠቢባታይ ሸፍር ምን ናይ ቤት ግማማት ለልዳሌ እቡ ፍንቱይ አግቡይ ሚ ቱ?

በሊሱ። እብ ዓመት ፍንቱይ ለወድዮ። ዲብ አምዕል እብ ቀሊል ዲብ ቤትነ እብ እንረክብ ግማማት እንዴ ደእንትዕብ እግል ነአዳልዮ ለእንቀድር ቱ። እት ረኣሰ እለሙ። ለናይ ቤት ግማማት ጸባይብ ፍገራት ሐርሱ ክምሰል ቱ። ወርዘቅ ጸብዋ ሰበት በ ለሐሰት ወድዮ።

ሰኣል። ምን መናፍዕት ናይ እለ ወራት-ፍንቱት እግል ትሸርሐ እግልነ?

በሊሱ። አዳላይ ጠቢባታይ ሸፍር ምን ግማማት ቤት ለልህይቡ መናፍዕ ዶል እንረኤ።

ለዐብ ለኢሊትካርም ርዘብ



ሻቡት አድያም ርዘኔ

ሸቅዮት ሸፍር ሰበት ኢልውዕል እግል ንወርክዮ ወጅብ። እብ ተውሳክ በርብሬ ለብዝሐ እቱ ጽቤሕ። ብዝሐ ዜድ ለብእቱ አሸዮእ። ሰገ ወዓሰ እግል ንትነፈዕ እም ኢወጅብ። ለእግል ንትነፈዕ እብ ለወጅብ ጅንሰ ግማማት አብያት ተረርፍ ሐመሊት ወፈዋክህ። ቀረርፍ ቤጭ። ተረርፍ እንገራ። ባኒ። ቅጫት። ትፍል ቡን። ቀጠፍ/ሊፕ-ቶን። ውራቅ ወሶፍት ቶም።

ሰኣል። እምብል እሉም ህዩ ብዕድ ለልኣትሐዜ አሸዮእ ህለ ገብሽ?

በሊሱ። አሆ። ምሰሉመ ዓማት ካርቦን ጀላብ እግል ልግብሽ እግልነ። ለትክፍክፈ ሰፊር አው ሰዐር ነካብር እቱ። እለ ኢትረከብ ምንገብሽ ህዩ። ውራቅ አው ሪሽ እግል ንትነፈዕ እንቀድር። ዲብ ሕድ ነካብር ዲብ ህሌነ እግል መሰል ሐቱ ዐረብዮት ግማማት ትንፈዐነ ምንገብሽ። ክልኤ ዐረብዮት አቀጥፍ ደቡሰ አው ውራቅ አው ርሽ ንትነፈዕ። እብ ከእነ እት ረኣሰ ሕድ ዲብ እንክውነ ከመርናህ ምንገብሽ ሰኒ ቱ። ግራሁ ለግማማት ናይ ኖሰ ማይ ሰበት ብእቱ። ማይ ብዙሕ ኢልትሐዜነ። እንዴ አትሌነ ዲብ ሕን ሐጋይ ምን ገብሽሙ። ማይ እግል ኢልህፈፍ። ዲብ ሕን ከረም ገብሽ ምንገብሽ ህዩ ዝላም እንዴ ዘልመት ዲብ እግል ኢትመሸምሽ እብ ፕላስቲክ እንገልብበ። ዲብ ደንገብ ህዩ። ዲብ ሳምን ክልኤ ኢነት ዲብ እንክሰት እንባልሱ። እብሊ ህዩ። ዲብ ቀበት ምርት ወሬሕ። ጸነ ለአለቡ ወርዘቅ ጸብዋ ለቡ ጠቢባታይ ሸፍር እግል ልትሸቁ ቀድር።

ሰኣል። ዲብ ደንገብ ለትብሊ ልኢክት ምን ብዙ?

በሊሱ። እለ ናይ መዳይን ግማማት እንዴ ተአክቡት ትሸቅት ምንገብሽ። ለዲብ ብሩር ህለው ሐረሰቶት እግል ትንፈዐም ትቀድር። እብሊ ህዩ ምን ብሩር ሌጠ እብ ብዝሐ ለልትረከብ መዋድ ኮምፖስት ምን መዳነት ዲብ ብሩር ለልዳሌ መዋድ እግል ኮምፖስት እግል ለካብር ቀድር። ሰበት እለ ለእብ ርሰሐት ልግብሽ ወእግል ርእዮተ። ዲብ ዓፍዮት አዳም ወድዋር ኤዝያይት ላተ ግማማት። ዲብ እለ ወክድ ጎነ ዲብ ረሸዶት አርድነ ዶር ዐቢ እግል ለህሌ እለ ለቀድር ርዝቅነ ክም ተ እንዴ ፈህምነ። እብ ለትፈናተ አግቡይ እንዴ ተሸቅት ዲብ መንፈዐት እግል ትውዕል እትፋኔ።



ግማማት

አሰክ ወክድ ፍሬ ልትረሸረሸ።

ዮካሽ ለልትባህል (ናይ ጃፓን ህግዮ ዲብ ገብሽ አክመርት በህለት ቱ) ናይ 7 አምዕል ሸፍር።

ኮምፖስት። ምን ናይ በዲር 3-6 ወሬሕ ነሰእ ለዐላ። ዲብ እለ ወክድ እለ መትሻፈጊ እንዴ ትነፈዐኩ። አግቡይ ሸቅዮቱ ዲብ ምርት ወሬሕ ተምም።

ምን ቀረፍ ቤጭ ለልሰነፅ ፊሻይ ሸፍር። ምን ዕንባብ አሰክ ናይ ፍሬ ወቅት ልትረሸረሸ።

ናይ ቤት ግማማት ዲብ ጠቢባታይ ሸፍር በደሎት። ውብዕድ ለሸምል ቱ።

ሰኣል። ምን ትብሉ ለዐልኪ ጠቢባታይ ሸፍር። ‘ለቀዮርት ናይ ቤት ግማማት ዲብ ሸፍር-ጠቢባት’ ለልብል አርእሰ ንንሰእ። እለ ሰነዖት ጠቢባታይ ሸፍር ምን ግማማት-ቤት ለልብል በርናምጅ እብ ከአፎ ትብገሰ?

በሊሱ። ክምሰለ እቤሉ። ምር ክፋል ሸቅል ናይላ ወጠንያይት ልጅነት እት ገብሽ። “ግማማትና ወርዘቅና ቱ” እብ ልብል አርእሰ እንዴ ትብገሰ ናይ ቤት ግማማት ዲብ ጠቢባታይ ሸፍር ናይ

መዋድ እግል ጠቢባታይ ሸፍር ለብእቱ ሰበት ገብሽ። ወቅት እንዴ ኢትጸበር ትንክሩ እግል ተአድምን ትቀድር። ዘባይት (መትዛብዮት) ምን ተረርፍ ነብረ ለትትረከብ መንፈዐት ምን ቅሩብ እግል ልድረሶ ሰዳ።

ዓይላት ህዩ ዲብ ከሸነተን ርዝቅ ብዕድ ክምሰል ህላመ ለአምረ። ጸብዋ ትርብት ጠውር። መቅደረት ጸቢዋ ማይ ህዩ ለአዘይድ። እብ መትነፈዕ ኪማኤያት አው ቀመማት እግለ ተአዘ ጨባል ዲብ ዳይመት ሓላቱ እግል ልብለሰ ሴድያይ ዶር ለአገዳ።

ሰኣል። ዲብ ሸቅዮት ጠቢባታይ ሸፍር እግል ንትነፈዕ እብ ለኢወጅብክ ጅንሰ ግማማት እሰዋ ቱ?

በሊሱ። አሰልፍ ለግማማት ክምሰል ከምክምናህ። ለሊሐቅቅ ወኢሊሐቅቅ (ለመሸምሽ ወኢመሸምሽ) እንዴ እምቤ እግል ንፈናትዮ ወጅብ። እብ ቀሊል ለኢሊሐቅቅ ለእምብሉ አሸዮእ። ክምሰል ፕላስቲክ። ቅርር። ሐጺን። ልባላ። እሰእኖታት። ሕብር ለቡ መጃላት። መናዲል ነዳፈት ክም ፓምፕር ወምዳሰ እትገብሽ። ዲብ መንፈዐት



አዳላይ ሸፍር ምን ግማማት

እብ ውዛረት ሐርሱ ለልዳሌ ዓመድ

ሸባብ

ነጃት ዑሰግን



ንዳል ዐዋቱ ናይ ዲመ ዐውቲ

ሓምድ እድራስ ዐዋቱ

ዐቤት ፍሬ ሰብተምበር ቱ። ወሐቱ ሰብተምበር ወልደቱ። ከሐቱ ሰብተምበር እግል ኤረትርዮን ሹባን ለዐበ ታሪክ ቱ። ሰበቡ ሐቱ ሰብተምበር ምን ህሌቱ ለሀለፍትን አመርዳ። ሐቱ ሰብተምበር ምን ህሌቱ ሕናመ እግል ነህሌ ለቀደር። እላተ ሰብተምበር እግል ታሪክክ ዲመ ክም ነብር ለወዲት ቱ። ሰብተምበር፡ ሕርዮት ወዐማር ወልደት፡ ተዕሊም ወቱክፍሎጂ አምጸአት፡ እሊ ክሉ ለወልደት ሐቱ ሰብተምበር ሌጣ ቱ። እሊ ዲብ ለዐል ለእንቤሉ ታሪክ ንዳል ሸባብ ኤረትርዮ፡ እግል ሹባን ማሌ ለኢብሌ ታሪክ ወእግል ሹባን ዮም ህይ፡ ሚ አውረሰዮም እግል ኒበል እንቀድር? ብዙሕ አውረሰዮም፡ ታሪክ፡ ውሕደት፡ መትሰባል፡ መዕጸም፡ ውርስ ዐዳት ወነባራ፡ ፈተ ወለመድ ሸቅል እሊ እግል ኖሱ ምስል ንዳል ለተአንበታቱ ምን እንብልመ ሐሰት ኢኮን።

አዜ እትሊ ወቅት ዮም ምንና ሸባብ ለትትሐዜ ዐባይ ንቅጠት ህሌት፡ ህተ ህይ ሕፍዝ እንዴ ወዲን ወዐባዩ እብ ንዳል ለዕሩዮም እንዴ ረኩብን ንዳል ወታሪክ ሸባብ ኤረትርዮ፡ እግል አጅዶል ዲብ ተሰጂል፡ ክቱብ ወሰውር እግል ነአጽንሐምቱ ህለ እግልነ። እግልሚ ምን እንብል እሊ ታሪክ እሊ ፈጅር እብ ቀሊል እግል ልትረኩብ ኢኮን። እሉም ዮም ለህለው አጅዶል እት ብዕድ ታሪክ እግል ኢልሕሰቦ እሰልፍ ታሪክ ዐዶም ወወጠኖም ዲቡ ክም ልተረዶ እግል ኒዴ ብነ። እግል እሊ ላኪን እግል ሸባን ዮም መርጃዕ ለገብእ እሉም ፍንቲ ለቤለ ታሪክ ምን ነሐድግ እሉም ለሐሰ አፍካር ውርስ ምን ሸባን ማሌ እግል ሸባን ዮም ወገብሉ፡ እሊ ህይ እግል ሸባብን ፍንቲይ ሹባር ታሪክ ከልቅ እቶም። ከሸባብን ፍንቲይ ሹባር ናይ ወጠን እግል ሊደው እብ ሰበት ታሪክም ቁሪን ለቡ አምር እግል ለህሌ እሉም ወጅብ። እብ መትሐሳር እብ

ሕበር ክል ኦርት ከእብ አምሩ ወቅድረቱ ሕበር ንሸቄ እቱ። ከዲብ ናይ ዮም ሰፍሐት ሸባን እብ ገሌ ምን ታሪክ ፋርስ ሓምድ እድራስ ዐዋቱ፡ ወመትዳላይ እግል መትሐሳስ ንዳል ሸባብ ኤረትርዮ በህለት 'ንዳል ክፋሕ ሙሰላሕ'፡ ሐዳይ ጣብዓም እክም ህሌን ትፈደሉ!

መትዳላይ
መትዳላይ እግል መትሐሳስ ሰውረት ኤረትርዮ [ንዳል ክፋሕ ሙሰላሕ]፡ ምን ሰነት 1958 አሰክ 1961 ንዳል ሰውረት ኤረትርዮ አንበተ። ምን ሰቱር እት ዋዴሕ እግል ልትዕዴ ላዝም ገብኡ፡ ዲብ ሉጁእ እት በራሱዳን ለዐለው ሹባን ኤረትርዮ፡ እት ሰነት 1958 እብ ምስጢር ለትናድል ሕዝብ አሰሰው። ሰሚት ናየ

አንፋር ፖሊስ ወሰብ ሰልጠት ኤረትርዮ ትዝመው ወእት ኩሉ መዳይን ኤረትርዮ አሰክ አዲስ አበባ ክም በጽሖ ገብእው።

ንዳል ተሕሪር ኤረትርዮ፡ እት ሰነት 1960 ዲብ ካይሮ ተአሰሰ፡ ሀደፍ ንዳል ተሕሪር ኤረትርዮ መትሐሳስ ሰውረት ኤረትርዮ ቱ ለዐለ። እት ሐቱ ሰብተምበር ሰነት 1961 ህይ እብ ሚርሐት ሓምድ እድራስ ዐዋቱ ወዐሰር ሰለሰ [13] ምናድሊን እት ደብር አዳል፡ መትሐሳስ ንዳል ሰውረት ኤረትርዮ ተአንበተ። ንዳል ሰውረት ኤረትርዮ እብ ሐዳም ምናድሊን አንበተ። ህቶም ህይ ሰዕ [9] ገዳይም መናዳቅ ሌጠ ዐለየ እግሎም። ልግባእመ ደአም ራትዕ ሀደፍ ወሰዳይት ሸባብ ሰበት ዐለ እግሎም፡ ዲብ ሐጨር ወቅት ዲብ ረአስ አባይ ብዙሕ ዐውቲታት



ሸባብ ሓምድ እድራስ ዐዋቱ

ሸባብ ኤረትርዮ፡ እብለ ትፈናተው ምስተዕምረት እግል ብዙሕ ሰፍታት ዲብ ረአሱ ለትፈናተ ጀራይም ገብእ ክም ዐለ፡ እብ ሐድ ለትሸራሕ ክም ኢኮን ክሉ ለለአምረ አማን ቱ። ኤረትርዮ እምበል አርዛቀ፡ ሸዐበ ኢለአትሐዜናኒ እንዴ ቤለው ለተብነው ምስተዕምረት ምስል ፍንቲት ሸንህቶም እንዴ ፈሸለው ክም ተርፈው፡ ለክምሰል ምራዮት ዋድሕ ላቱ ታሪክን ለአክደ። ምን ሐረስ እሊ ህይ፡ እት ብዝሓም ኤረትርዮን ወጠንደይ ሹባር እግል ለህሌ ለቀድረ። ምን እሊ ህይ ንዳል ሰውረት ኤረትርዮ፡ እብ ሸሂድ ፋርስ ሓምድ እድራስ ዐዋቱ አሰብደ።

ታሪክይይት አምዕል ቱ። እት ወቅት ለህይ ሹባን ኤረትርዮ እብ ውሕደት፡ ፈራሰት፡ ከሃለት ሰብር ወኤማን ዲብ ቅብላት ለትፈናተው ምስተዕምረት ተዐንደቀው። እሊ ንዳል እሊ ህይ፡ እብ ሙናድሊን ዐዋቱ ወመልህደሙ እግል እሊ ዮም ንትመታዕ እብ ለህሌን መስኩብት ወነዐይደ ለህሌን ሐቱ ሰብተምበር፡ ዳይመት ሕርዮት ወልደት እግልነ። ሰበት እሊቱ ንዳል ዐዋቱ፡ ዐውቲ ናይ ዲመ ለእንቤሉ። እሉም ሙናድሊን እሉም፡ ሕነ ፍዝ ሸባብን ወሸባብን ሰላም እግል ልርኩብ እንዴ ቤለውቱ ለአርወሐቶም ፍዝ ለወደው። ታሪክ ሸባብ ኤረትርዮ ለህይ ከምን ለህይ ቱ ለወርሱ። ምን ሐቱ ሰብተምበር እብ ዐዋቱ ለአንበተት ውሕደት፡ ወመትሰባል ምን ጂል እት ጂል ዲብ ልትዋረስ ዐለ ወሀለ። እሊ ክሉ ወጠንደይ ሙናሰባት በህለት ዓዶድ ናይ እሊ ወጠን፡ ክሉ ምን ነአሸት አሰክ



ለናይ ሰልፍ ምናድሊን

ሕዝብ ሐረከት ተሕሪር ኤረትርዮ ትትብህል ዐለት።

ዲብ ኤረትርዮ ህይ፡ መሕበር ሹውዳቱ ትትብህል ዐለት፡ ሀደፊ መሕበር ህይ፡ ሕርዮት ኤረትርዮ እብ እንግላባት ሕኩመት እግል ልትአክድ ቱ ለዐለ። ለዲብ ዐለዮ ዐለው ኤረትርዮን እግል ልትዝም አንበተው። እት 1959 ህይ አሰክ ኤረትርዮ አንፋር እግል ልልአት አንበተው። እት ሐጨር ወቅት ብዝሓም ሸባብ፡ ሸቃለ ሕኩመት፡

እግል ልሰጅሎ ቀድረው። ዲብ ሰነት 1961 ወ1964 እት አዳል፡ አማል፡ አምላዮት፡ አዳር ሃንጀር፡ ሐልሐል፡ አቅርደት፡ ሀይተተ፡ ዐንሰቤ፡ ወጀንገራን እብ መትሐራብ ዲብ ረአስ አባይ ከሳራት አጅረው። እግል መሰል እት ጃላይ ሰነት 1962 እት አቅርደት ለገአት ዐመልዮት፡ ለትወቀለው ሰብ ሰልጠት አቶብዩ ለብእቶም 62 አንፋር ጃርሐው ወ3 ህይ ሞተው። እት ዐመልዮት ሀይተተ ህይ፡ ዲብ ሰነት 1963 ለመሰለ ዐመልዮት ምን አባይ ብዙሕ መናዳቅ ሳለበው።

እሊ እንዴ ወሰክ ገይሰ ለዐለ ብዝሐ ሙናድሊን እግል ልትዐንደቅ ቀድረ። አላፍ ሙናድሊን ህይ ዐረምም። እብሊ ህይ ክርን ሰውረት ዲብ ኩሉ ኤረትርዮ ትሰመዕት። አወላይ ጽቡጥ አው [አሲር] ሰውረት ኤረትርዮ፡ እሊ ዲብ ሐርብ አዳል ለትጸበጠ ቤረግ ኖራይ ቱ። አወላይ ሸሂድ ሰውረት ኤረትርዮ ህይ ዐብዱ መሐመድ ፋይድ ቱ። ህቱ ህይ ዲብ ሰነት 1961 ዲብ ሐርብ አማል፡ ሳወ አሰተሸሀደ። እት ጁን ሰነት 1962 ህይ ሓምድ እድራስ ዐዋቱ እብ ሕማም አሰተሸሀደ።



ዐዋቱ ሰውረት እንዴ ኢለአነብት

ሐዘን ወግርመት

ኬትባይ = ያሱናሪ
ተርጀመት = የጳጳስ እድገት አሜር

27ኛ ክፍል

መናገር ናይ እባን

ካይኮ ላተ ኢበልሱት እተ። ምናተ ለግንሐትሉ ዕንታተ እተ ኣነኩ እት እንቲ። እብ ብጣሪ ገብአት። ዲብላ ሐማም ለዐለት ክርንላ ጨብረቅረቅሎ ማይ ኢሰመዐ ኢዐለ እለ። ኦቲቲ ዲብላ ሐፍን ሐማም ማይ ብሩድ ትክኔ ዐለት መሰለኒ። ምናተ ለግንሐት ምልእት እት እንተ ለማይ ላቲ ኣሰክ እለ ልትክኔ ዐለ።

ካይኮ ዲብላ ሐጠትሉ ረሰም ዕልግት ለዐለት መዐፍየት ዲብ እንዲ ቀርቡት። ምን መሕፈዘትሉ እዲላ ገጸ ለተትጋርም እቡ ዐፍሸት ዚነት ኣፍገረት። ከእግለ ጭገረ እብ ምሽግይ ንኡሽ ናይላ ፍደት መሸጠቲ። እተ ቁርፈትሉ ዚነት ቀደምሉ ሐማም ለዐለት ጠረቤዘት ወመዐፍየት መተሐርከት ዐለት።

ካይኮ እለ ቁርፈት እለ ዲብ እግል ትእቲ ሐዘኑት። ምናተ ኦቲቲ በለሉት እፍግርት እተ ሰበት ዐለት ኣቅበለት ምን። ምን ከዛነትሉ በለሉት ልባሰ እንዲ ኣፍገረት ከምን ረኣሰ ኣሰክ እግሪ ቀየረት። ኣጥራፍሉ ቀሚሰ ዲብላ ኪሚናሃ እግል ተኣትዮ ወረገበትሉ ስጋደ እግል ተኣትሳኔ ሐዘኑት። ምናተ ለእደዮ ረጅፍ ሰበት ዐለ ፈጅኦትን 'ኦቲቲ!' እት ትብል ትላኬት።

ካይኮ ረኣሰ እድንን ዶል ኣበለት ለዕንተ ዲብላ ኣጥራፍሉ ብላዮ ፍዑል ለዐለ ዘኻርፍ ትከፊት። ከምን ኣቅመተተን ለገበይ ለእብ ፍሱማት ዐለዮ ሸቅል ኦቲቲ ክምተን ለሐብረ ዐለዮ። ኦቲቲ እለን ርሱማት እለን ጀላብ ርሱማትን ክም ዐለት ትካየሉ እለ። ለርሱማት ናይ እዋን ሐጋይ ዕንባባታት መሰለ ዐለዮ። ወለእሱብ ለተጅራዲ ለእቡ ትረሰመዮ ምን ቅደሰ ወለዐል ጀራእ ሰበት ዐለ። ለልርእዮን ህተ ክም ረሰመተን በታተን ኢለኦምን። ስኒ ግሩማት ዐለዮ። ኣማን ተሐይሰ ናይ ከያል ዕንባባታት ተን ዐለዮ። ለሓባረን ለትፈናተ ወለ ምን ዐላመ። ምስል ክም ገይሰ ለትወደዮ ገበይ ወምስል ናይ እለ ዘመን እለ ሞደት ለልትዋፈቀ እብ ገበይ እብ ሸቀዮት ዐለዮ። እለ ኩሉ ምስል እብ ሕበር ናይ ሸባብ ወረዋየት ሸዑር ለሀይብ ዐለ። ወእምበል ሸክ ኦቲቲ እለን ዕምባባታት እለን እተ ወቅት ለምን ካይኮ ትትፈንቲ ዲቡ ለዐለት እቲ ርሱማትን ትገብእ።

ኣምዮ ምን እተ ጀፈረ ለዐለት ቁርፈት። እንቲ ሸንብሬብት እግል ትፍገሪ ሳተት ህሌኪ ወለሚ? እት ትብል ትትሀርሀር ዐለት።

ካይኮ እንዲ ኢትትወለብ ዲብ ትሰኣለተ።

- እግልሚ ክምእነ ትገንሐኒ

ህሌኪ? እለ ምን ገብእ ንዕዲ ቅረቢ!

ካይኮ ኣምዮ ምን ረኣሰ ኣሰክ እግሪ ተማም እትፋጠነ ወሸክክት እት እንተ ተኣቀምተ ሰበት ርኤታ ቲ። ኣምዮ ኣዜመ ምን ሐዲሰ ትሰኣለተ።

- እግል ትፍገሪ ሳተት ህሌኪ?
- ኢፋልዬ።

ካይኮ እግል ኣጥራፍሉ ጀላብዮተ እብ እዲላ ማነ ገጹ ለዐል ከምከመቲ። ወለ ሕዛመ እብ እዲላ ገለበ እንዲ ሀረሰቲ። ከኣሰክለ እትሉ ቃዕትሉ ሐማም ለትትረከብ ቁርፈትሉ ዚነት ኣተጀሀት። ፈጅኦትን ክምእነ ትቤ።

- ኣምዮ፡ ለሸራባትዬ ናይላ ግጥን ትረሰዕትህ። ምን ሐዲይሰ እብ ኣርት ምጽኢኒ።

ኦቲቲ ጭፍር ካይኮ ክምሰምዐት። ዲብላ ሐማም ኣሰክ ትመጽእ ለህሌት መሰለዮ። ከእንዲ ነቅመተ
- ካይኮ እለ ማይ ከፎ ጥዑም ህለ መሰለኪ!



ካይኮ ላተ ቅብላትሉ መዐፍየት ለመተሐርከት እንዲ በጥረት ከሕዛመ ተኣሰር ዐለት። ወምን ክትርመ ሰደቲ ለኣምዲተ እግል ልብተክ ለሐዘኑ ዐለ።

ኣምዮ እግል ሸራባት ኣምጸኦቲ። ወምን ህግዮ ሴመ እንዲ ኢትብልሰ እት ሐንቲ ካይኮ ከፊቲ ከፈግረት።
ኦቲቲ ኣዜመ ምን ሐዲሰ፡ ኣፎ ኢትሸፍጊ! እት ትብል ነቅመተ።

ኦቲቲ ዲብላ መቅጠሰ ግሲት ዐለት ወለ ማይ ኣሰክለ ነሐረ ሻመ ዐለ። እብ ዕንታታ ኣሰክለ ባብ ተኣፍኪ ዐለት። ወምን ዶል እት ዶል እግል ካይኮ ትታኪ ዐለት። ምናተ ምን ረሐርሰ ባብ ለልትሰመዕ ጭፍር የዐለ። ወለ እፍጋረት በለሉትም ትግበእ።

ኦቲቲ ሸክ ወዲት። ካይኮ ምስልዬ እግል ትትሐጸብ ኢሐዘኑ ማሚ? ፈጅኦትን ህይ ትዳየገት። ወእብ እደዮ እግል ኣጥራፍሉ ምቅጠሰ እት ትጸበት ምን ማይ ፈግረት። ካይኮ ሐቆ እለ እት ቀደሚዬ እብ ብራቀ እግል ትግበእ ኢሐዘኑ ገብእ? ሐቆሉ ምያየተ ናይ ኣፍሽመ?

ካይኮ ምንግ ምን ቶክዮ ኣቅበለት ክልኤ ሳምን ሓልፋት ዐለዮ። ወእተ ግስመት ለወዲቲ ወቅት እት ዝያረት ኦኪ

ኣሰተፈደት ምን። ወህቲመ ኣሰክ ኣፍሽመ ኣትዛወረዮ። ምን ቶክዮ ክም ዐቅበለት እግል ከም መረት ምስል ኦቲቲ ተሐጸበት ወእምበል ክጅል እት ቀደሚህ ብራቀ ጋብኣት ዐለት። ወምስል እለ ዲብ እለ ዮም ሌጤ እት ቀደም እለ ናይ ሳይሆጂ ተርቲባትሉ እብን። እግል መለሀዮ ዲብ ኣፍሽመ ሐቲ ላሊ ምስል ኦኪ ክም ትመዬት ኣምነት እለ። እለ እዕትራፍ እለ ላኪን እግል ኦቲቲ ምን ቅደሰ ወለዐል ተጠርፍ ለብዲቡ ወእግል ልትፈሀም ለኢልትቀደር ዐለ።

ኦቲቲ ሐቆ ስኒን ኣምዕል ኣሰር ኣምዕል። ካይኮ እሰዉ ኑዕ ምን ኣዋልድ ክምተ እት ተኣንተብህ ዲብ መጽኦት። ህተ ምን ቅደሰ ወለዐል ክም ትፈትዮ ወምን እግል ትትፈንቲ ክም ኢተሐዘኒ እግል ተኣምር ቀድረት። ወእለ ኣደብ ካይኮ ለቀራብ ሰሩ ኣር ላዘምቲ ምን መሰኡልየት ኦቲቲ እግል ልግበእ። ወለ እሳት ናሰ ክም ቀርሐተ ሸክ ለለኣወዲ ጋር ኢዐለ። እብ እለ ሰበብ ለመሰኡልየት ኩሉ እብ ኣነን እለ እብ በይን እግል ተኣርፈዐ ለልትቀደር ኢኮን። ከዲብላ ቃዕትሉ ሐማም እተ ትትጸበር እቲ ዐለት ወቅት። ቅጥሬታት ናይ ለህበት ብርድት እተ መላተሐ ለኣንጨዋርሐ ዐለዮ። ከክም እነ እት ትብል ትሰኣለት።

- ካይኮ እግል ትምጽኢ ኢኮን?
- ኢፋልዬ።
- እግል ትትሐጸቢ ኢተሐዘኒ?
- ኢፋልዬ።
- ላኪን ለገርብኪ እብ ለህበት ሕጽብ ህለ መሰለኒ።
- ኢፋሉ፡ ደሐን ህሌት።
ካይኮ መደቲት ትም ብህለት እንዲ ዐለት ክምእነ እት ትብል ኣትዕሬት።

- ካይኮ ኣነ ስኒ እሰፍት ህሌት። ኢትጸብጤ ዲብዬ፡ ሳምሐኒ ...
ክርንተ ስኒ ዋድሐት ዐለት። ኦቲቲ ክምእነ እት ትብል በልሰት ዲብ።

- እሳምሐኪ ... ከለጥ ላቲ ኣናቲ ከለጥኮ ወእግል ኣዕተዝር ምንኪ ለወጅብኒመ ኣናቲ።
ካይኮ ኢበልሱት ዲብ።
- ደሐንኪቲ ማሚ ኣፎ ዲብ እለ በጠርኪ?
- ሕዛምዬ ኣሰር ህሌት
- ሚ ትብይ? ሕዛምኪ ከፎ?
ኦቲቲ ሸክ ሰበት ወዲት። እት ሸፍግ ገርግ እንዲ ኣዘፈፈት ከለባብ እንዲ ፈትሐት ምን ኣቅመተት። ካይኮ እት ሓለት ስኒ ግርምት እት እንተ ረኤተ።

- እግል ትፍገሪቲ?
- ኣይወ።
- ኣሰክ ኣየ እግል ትጊሲቲ?
- ኣምረት ኢህሌት።
- ካይኮ ክምእነ እት ትቤ ዲቡ እዋን። ለዕንቲታተ ግሩማት ቁሩብ ሐዘን ልትረኤ ዲብን ዐለ።
ኦቲቲ ህይ ምን ብራቀ ለእተ

ኮባብ

ሻም ዕዉር ቱ!!

ሐቲ ሸንብሬብት ሕጅብት ዲብ ኣርት ንኡሽ ድጌ ትነብር ነብረት። እግል ኣርት ስኒ ምን ቅደሰ ወለዐል ግሩም ላቲ መንደላይ ፋትየት ዐለት። ለሻም ክሉ ለለሀድግ እቡ ዐላመ ዐለ። እት ቀደሚህም ሐቲ ለኢትትሐለፍ ሰበር ታክለቶም ዐለት። ለሸንብሬብት እግል በዐል ሻመ እግል ትርኣዮ ሰበት ኢቀድረት። ዶል ለእብ ክልኤ ዕንተ ትርኣዮተ እግል ትትህደዮ ክም ቲ ተኣሰኢት ዐለት።

ኣምዕል ሐቲ ምርት ነፈር እንዲ መጸ እግል እለ መሰኪነት ወለት እብ ክልኤ ዕንቲ ትብረዐ እለ። ሐቆሉ ገብኣት እለ ዐመልየት እግል ትርኣኤ ቀድረት ወኖር ዕንታተ ኣቅበለ ዲብ። እግል ሰልፍ ዶል ህይ እግል እሉ ፈቲት ወፈትየ ለዐለ በዐል ሻመ ኣቅመተት። ምናተ ለመንደላይ ሕ'ጁብ ወሐቲ ለኢልርኤ ክም ቲ ዶል ኣመረት ሰእየት በትከት ወምድር ወሰመ ምስል ጸልመተ እተ።
ለፈታየ ህይ እግል ልህደዮ ክም ለሐዘኒ ወህተ ኣዜ ክም ርኤት እግል ትትህደዮ ሸንሀት ምን በ ትሰኣለዮ። ለወለት ግርደት እት እንተ እግል ትትህደዮ ክም ኢትቀድር ኣሰኣለቲ።
ለመንደላይ ስሕቅ እት ልብል፡ "ከረቢ ልሕፈዘኪ። ምናተ እለን ምስልኪ ለህለዮ ክልኤ ዕንቲቲፍ ብዘሕ ሕሳብኪ ወደይ እለን ወሰኒ ዕቁብን?" ቤለዮ።



ተብሰም



ሐቲ ወለት እብ በይን ግሲት እት እንተ እብ ሰሓቅ ከዕ-ከዕ ትብል ለረኣወ ጀማዐት። ደሐንኪቲ ኣፎ በይንኪ ትሰሐቅኪ? እት ልብሎ ትሰኣለወ። ህተ ህይ፡ መሰንደዮ ዕልብ ተለፎን በዐል ሻምዬ እግል ህበ ትሰኣለተኒ! ህቶም ህይ፡ ከሰኒ፡ ዲብ እለ ለለኣትሰሕቅ እሰወቲ? ቤለወ፡ ህተ ህይ፡ ዕልብሉ ተለፎን ላቲ ሀብኮሃ ቲ። ወእላተ ረሳይል ሻም ኣሰክ ሐሀ ዲብ ትነድእ እለ ዮም ሳልሰ ኣምዕላ ተ።

ትገሴት። ወለ ዕንታተን ህይ ዲብላ መዐፍየት ትራክብ።
- ኣሰክ ከግማሺ ምን እንገይሰ ሚ መሰለኪ? መ ኣሰክ ኣፋዛ ለሐይሰን? ተለፎን ወደይ። ዲብላ ሰጥሕየት ጣውለት ኢትረከበት ምን ገብእ። ቃዕቲት ንኡሽ ዲብላ ኣወላይ ጣብቅ ኣው እት ለገበኣት ኣነን ልጽበጦ እግል። ሸርጥ ላኪን ላዘም ቅብላትሉ ነሀር እግል ትግበእ ብዲብ ... እለ ለሳረት ተ። ኣነን ብዕደት እግል ንገለ ቲ።
ካይኮ ወፍቅት እት እንተ ክምእነ ትቤ። ስኒ፡ ኣናቲ። ክባየት ማይ ብሩድ እብ ተልጁ ተሐዘኒ?
- ስኒ፡ ለምድር ሕፋን እጅ ክም ህለ እት ኣመርህሌት?
- ስኒ ወኣማን።

ዐለት ቅሩብ እብ ክጅል ሰበት ሸዐረት። ብሌታይ ከፊፍ እቡ ትገልበበት።
- ኣነ ምስልኪ እግል ኢጊሰ ቲ።
- ስኒ ወዲኪ።
- ምን እገይሰ ምስልኪ ተኣብዮ እግልዬ?
- ኢፋልዬ፡ ስኒ የኡብዮ እግልኪ።
ካይኮ ክምስልሁ እት ትብል ግራህ ሃይብተ ዐለት። ለገጸ ላኪን እብ ኣርት ኣንክሩ ዲብላ መዐፍየት ልትረኤ ዐለ። ከእንዲ ኣተላላት።
- እትጸበረኪ ህሌት።
- ስኒ፡ ኣናቲ የኣክረኪ።
እግል መደት ቅርብት ምንዬ እግል ትትፈንተይ ንዩት ብኪ?
ወእግል ካይኮ እንዲ ተዐርፊት እት ቅብላትሉ ጣውለትሉ ዚነት



ዓዳቱ ለይአከቦ፡ ረአሱ ኢትሪከቦ (2ኛ ክፍል)



እብ ገባዩ እንዴ ረክቦ ክም አፍገሪዩ እተ ክታብ ረክቦዩ። ወእብ ቀናህ ወሽዕሪ ለምን ዘበን እንግሊዝ እብ አፍ ምን ጃል እት ጃል ተሐልፍ ለጸንሐት ሕላዩት እግለ እተ መሓደሪት ጅመብ እግለ ዐለ ሽቦብ አሰመዐዩ።

ለእተ ክታብ ሀሌት ሽዕር ክእነ ተሌቱ

ጅጉር በዐለ ነሻብ አዩ ሀለ

ለሕጃብ -ጅጉር ከራባካ

አመቅሪቡ ትሰለ ክመ ሆላይ

ትገለ -ጅጉር ከራባካ

አሰእሎም ሰብ ሀይት መሐመድ

ጅጉር ሞተ -ጅጉር ከራባካ

አቡኪ ኬርአለህ ሰነይ ድሩይ ሀለ

- ጅጉር ከራባካ

አቡኪ ኬርአለህ ጋዩ ላክን ሀለ -

ጅጉር ከራባካ

አቡኪ ሀዳወ አምር እንቱ ቀው -

ጅጉር ካራባካ

ሀደምደሚ ሀልጊት ሀደምደሚ

ሀልጊት

ገርሀት ተርፈት ወእሲት - ጅጉር

ከራባካ

ጅጉር ለሽሃይቱ ደግመት

ለቃፍሉቱ

ጅጉር በዐለ ነሻብ አዩ ጌሰ

ለሕጃብ

ሀደምደሚ ለሀጊት ገርሀት ተርፈት

ወእሲት

ሓምድ ወዳይ እኪት እግል አሳዩ

...

ለሕላዩት እብሉን ሰለሰ ንቅጠት

እንዴ ተሌት እተ ባዋረት ሰበት ሀሌት

ረደም ክምተ እግል ንፍሀም እንቀድር።

እት መናሰባት ለልትሐሌ

ሐልዩትህ ሀሌ ብዙሕቱ። ዲብ ጉልጂ

ወድዋራቱ - አቅለም ምግብ ዶል

ወቅራት ናይ ዒድ አንሳት ምዕዋን

እንዴ ወርደዩ ምን ለልሐልዩህ ሐቱ

ሕላዩት። እግለ መሕበር ትከብቶ

ምንዬ እት ልብል እብ ቀናህ ወሽዕሪ

አሰመዐዩ። እለ ተሌተ።

አነ ሀዩ ሀዩ

ሀዩ ሀዩ

ሀዩ ሰኒ ፋሉ

ሀዩ

መጽአ ለዕያሉ

ገዜፍ ለሚለሉ

ሀዩ

ክሕለት ትከሐልናቡ

ሀዩ በለ መሶ

ሀዩ

ሐረር ወከሰሶ

ሀዩ

ሀዩ በለ ሰነት

ሀዩ

ሐረር ወብርሃነት

አነ ሀዩ ሀዩ ሀዩ

ሀዩ

ለትብል እብ ቀናህ ቀደመዩ።

እምበል እሲ አንሳት እት ኬወ

አብራ ዲብ እንተን። ለትፈናት እብ

እዴ ለልትሸቄ ናይ ገኖ ወከዐሌ

ፈርዶት። ግድሎ ወሰርን ለለርኤ ሰወር

እንዴ ቀደመ ለበሀል ነገራ። እት እማት

ወምሰል እማት ክም ሀለ ወህተን ምን

ሐፍዘዮህ እግል ልትረከብ ክም ቀድረ

አፍሀመ።

ልተላሌ...

ሽቦብ ለሕጌህ ሰውረት...

ምን ገጽ 6 ለተላላ...

ዐሳክር አሳይ እት መዳሊቶም ወሀጃዎም ተሐት ወለዐል እት ልብሎ እሲት ሐቱ ክም ሺይናይት እንዴ ትመሰለት ግፈተ እት መሸንገለ እንዴ ወዴት መልጫት ምኖም። እሰልፍ በዐል ደሐን እት መሰል እብ ምልሃዩ ሄረረት። ሐር ላኪን ሸፍግ-ሸፍግ እት ትብል። ፖሊስ ረአወ። ምናተ አሰክ ሸቅለ ትገይሰ ለሀሌት መሰለዮም ወኢትሐሰረው ዲቦ። ወዲብ ምህእ ክም ትከፊት። ለግፈተ እንዴ ለክፈት ፋርሀት ዲብ እንተ ግራሀ እት ትትዋለብ። አሰክለ ከረ ሓምድ ዐለው እተ አነነት እት ትሰባ። እናሰ ምርት ትቃሰለዩ። ደሐነ ክም ኢትን አመረ እብ ወአብጠረዩ።

“ኖሰኪ ቱ።”

“ደሐን ቱ። ሓልፈኒ።”

“ኢሓልፈኪ! አሰክ አዩ ተሐዘ ሀሌኪ።” ቤለዩ ካርፈ ዲብ እንቱ።

“አሰክ ብትርቦ” ቱሉ።

“ለሰዐይኪ አሰክ ሸቅለ ኢመሰል። ምስምሰ ብዕደት ሕዘይ”

“ከግድም። ልእክት ሀሌኮ” ቱሉ። ለቱላሉ ክም ደሐን ሰበት መሰለ እተ።

“ከሚ ተ ለልእክትኪ አሰክሊኒ...”

“እግል አሰክላኪ። እሰልፍ ክም ትትለእክ እግልዬ መሐል እግዬ። ኢፋልዬ

ምን ትብል ሀዩ ከላሰ ሓልፈኒ።”

“ወላሂ። ለእለ ተሐዘ እግል ኢዴ እግልኪ” ቤለዩ ወሐቀህ ወተአርሕሙ

ወሐጠረ ልዕጀቡ ግወዮ።

“ከግድም። እት ድንኮ ሕኩመት ማጽኦት ሰበት ሀሌት። እግል ከረ ሓምድ

ምን መሓዝ ክም ልትነውት ውዴ።” ቱሉ። ሀቱመ ደሐምቀ። እብ ሸፋግ

ጌለዮም።

ሓምድ እግለ እናሰ ምን ረዩም ክም ረአዩ። እግል ከራር አድም እንዴ

ነቅመ። “እለ እናሰ ከበር ብገሩ መሰል ርከቡ።” ቤለዩ። እንዴ ትቃሰለዩ እግለ

ቱላል ክም ሐበረዩ። እት ዶሎም ፈግረው። እንዴ አትለው እምበል ምርት

እናሰ ወአጀኒት ነኣይሽ ለበዝሐዩ አንሰ ሌጠ እተ ዐለ ዲቡ አድምደማም

ለልትበሀል ድን ክም በጽሐው። 30 ለገብአ ፖሊስ እተ ግራታዮም ተለው

ቤለምም። ሞርድዮት ሰበት ረአዮም ምኖጋር ሰበት ሐግለው ላኪን እት ደማን

ለበ አነን ውቅል ድፈዕ ጸብጠው ወእግል መዐረከት ትዳለው። ለዐሳክር ላኪን

ኢረአምም። ገበይ ምን ሰበት ሸክፈው። አሰክ ማሸኩል ሐልፈው። ገበይ ክም

ከልጠው ክም አመረው። ከረ ሓምድ እተዩ ክም ሀለው እንዴ ተአክደ እብ

ሸፋግ ለልአቀብሎም ሸበንካላይ ምን ማሸኩል አሰክ አድምደማም ለአከው።

ሀቱ እተ ዐድ ክም አተ። ለአንሰ “ምን አዩ እንተ?” ትሰለደሀሁ።

“ፖሊስ እት ዐድነ አተው። ወሸፍተ ሀለው ምን ገብእ እንዴ ረኤክ አቅብል



ቤለውኒ” ቤለዮን። ሀተን ሀዩ እት ምግብን እንዴ አተዩ ሐቱ ትትግዩሩ ወሐቱ ትትብእሱ “እንተ እት ዐድ ለገብአ ነፈር ክም ኢሀለ እት ተአምር መጽእክ ከእብ ሓምድ ትትሰእለኪ። ጊሰ ትሸክክ” ሰበት ቤለዮሁ። ሐቱ እንዴ ኢሊሰፊ አሰክለ ፖሊስ አቅብለ። ከ “እምበል አንሰ ግድሎ ብዕድ ኢረኤኮ” ቤለዮም። ሐቅ እለ አገድ አደምደማም እንዴ ሸአገው እናሰ ምርት ጸብጠው ወ “ከረ ሓምድ እተዩ ሀለው” እት ልብሎ ዛበጠው። “አነ እት ገርሀት ሰበት ወዐልኩ። አዳም ኢረኤኮ” ቤለዮም ክም።-መ ሐብራ ኢረክበው። እት ደንገበ እግለ እናሰ ገበይ ሸራፍ አጽብጠን እንዴ ቤለው ለገበይ ክም ሐብረዮም ከክም ፊመው። ጠወሺ ለረፍዮ ምሰሉ አጀኒት እንዴ ነሰአ አሰክ ከረ ሓምድ ጌሰ ወጸብሐዮም።

ዐሳክር ሕኩመት እብ ምን ጀዋሰሰ ረከብ ለዐለው ሐብራ ደርዮም እት ገብኤ። ወከረ ሓምድ ምን ሸቦብ እብ ረከብ ለዐለው ሐብራ እት ፈግሮ ለሰውረት አርወሕ እንዴ ሀበው እት ሓርዮም ሓልፈው።

ከሰውረት ኤረትርዮ ምን ብጋሰተ ሕጌህ። መስተዩ ወሴፋሁ። ልባሰ ወጽዋረ ሸዐባቱ። ክምለ እለ እንጊራ ጸንሐነ አንሳት በዝሐው እትነ ወተዐብነ ኢቤለዩ ለምን ዐድ ልትጠሉብ ነበራት ማየን እንዴ ወርደዩ። ዕጩዮን እንዴ አረዩ እንዴ ጠሐነዩ ወአብሸለዩ ለሀይቡ ሙናድሊን ምን ሀግት አሳይ እግል ለአንግፈ እብ በሰር ልልእክ ወልትለእክ ነብረዩ። እለ ሐጠር። በሰር ወምርወት ለወርሰው ውላደን ወአዋልደን ሀዩ እሎም ቶም ኤረትርዮ ሻነት ቀበት መሕበር ዋድዶም።

ዒማት። ክታብ ሓምድ እድራሰ ዐዋቱ እብ ሃይሌሰላሴ ወልዱ

ክምለ እተ ሐልፈ ክፋል ለእንቤሉ በሀል ነባሪ አሳሰ ናይ ክሉ ለልትረኤ ወኢልትረኤ ዓዳት ቅዩም ወሰዋልፍ ሙጅተመዕ እት ገብእ። ምን እብ አፍ እት ልትደገም ለትብር ወምን ውሉድ እት ዋልዴ ለልሐልፍ እዴ ለትሸቅዮ። ሐንገል ለሰጅሎ። እት መንፈስ ለሰብቀ መፍሀማት። ፈልሰፈት። እምኖታት ክሉ አግማም ቀዳም እት አግማም ሓር እብ አፋሁ እት ለሓልፎ ነብር ለሀላቱ። መሀረጃን ወጠን ሀዩ ምር ምን እለ በሀል ነባሪ እግል ልንበር። ድራሰት እንዴ ገአት እቱ እት መትፈርጃይ እግል ልቅረብ ሰዴ ለሀለ በሰር መትራከቢቱ። ክምለ ዓዳቱ እንዴ አብደ እት ሕባራት ላኪፍቶ እንዴ ገብእ ረአሱ በዴ ለሀለ ገባይል እግል ኢንግብእ ሀዩ። መሀረጃናትን እት ሕፍዘት ቀዳሚት ምንገብእ ወአትሐሳሳይል ልትረሰዕ ለሀለ ዓዳትን ሐዘቱ ዐባይ ክምተ። ወበርናመጅ በሀል ነባሪመ ጅላል መሀረጃናትን ክምቱ። ‘ዶር በሀል ነባሪ እት መሀረጃናት’ ለትብል ወረቀት ሕፍዝ ለቀደመ እሰታዝ መሐመድሰዒድ ዐሰማን አፍሀመ። እት አክቤ ቅዩም ወነባሪ። እት ብገዮት ሸቦር ፍቱ ሕርዮት ወወጠን። አማን ወበራሀት። እት ሕሜት ወሐምዴ። ግዳት በሀል ነባሪ ዐባይ ክምተ ለለፍሀም ሀዩ ብዙሕ አምሳል ሀድገ።

ሐቱ ምንን ምሕርባይት እምነ ዜነብ ያሲን ለቱላተ። ዕርፍ ወሕንቃቄ ወጠን ክም ጸባዩ ክምቱ። ምን ሕኔት ቤትክ እግል ኢትሕደግ እት ሐንቱ አሳይ ነበር። አውመ መቅጠንክ እግል ልብረድ እክ ዐለዮ አሰክ አርድ ጸርኩ። እኪት እንዴ ከሀልክ ሕርዮት አምጽኦት ክም ልትፈደል እግል ትሸረሕ አፍገረተ። ሀተ ምስል ክሉ ዐደ ምን አፍዐበት እንዴ ፈግረት እት ወግሬት ትነብር እተ ዐለት እቱ። ቱላል ሰውረት ሰዴድ ዲብ ዐለ እተ መርሐለት ናይ ሰልፍ 80ታት። መሰኢሊን እዳራት ሸቦብ ለዐለው ሙናድሊን ለዕምረ/ ዕቢናህ እንዴ ረአው ብዙሕ ምን አርሐመቶም። ምን ከርከር እት ከደን ተግርፍ እሎም ፈተው። ከበለወ

“እምነ ዜነብ አፎ ሰዳን ኢትገይሲ ከዐርፍ ኢተአብሊ እኪ።”

ሀተ ሀዩ ለሀግዩ እለ ልበ አከረዩ ከቱሎም


ምስል ደርጊ የአትዩ ቤቼ ዐሰር ምክራዩ

ወሰዳን ይእገይሰ ይእፈትዩ ምዕዳዩ ኤረትርዮ ተሐይሰኒ እት ግብ ምስል ከራዩ

ወክምለ እለ ተሐዘ ዐለት ደርግ ክም ትጸረገ ቤተ ካርበት መ ትጽነሐ ድኢትን አቱተ ወሐድረት እተ።

እት ገባይል ትግሬ እናሰ ክም ሞተ አንሰ ክም ዘፍናሁ ነአምር። መአንብታይ ንዳል ክፈሕ መሰለሕ ተሕሪር ኤረትርዮ ላቱ ሙናድል ሓምድ እድራሰ ዐዋቱ ላኪን። ምስል ጸሩ እግል ምር ደለ እለ ኬደው እግል ፖሊስ እንግሊዝ ለአሰክል እሶም ለዐለ ጃሱሰ ሞት ክም ሐክመው እቱ ዘፍነው እሉ። ለነፈር ጅጉር ልትበሀል። ምን ጀሳሳቱ እግል ልጀመል ለአይክ ብዙሕ ጌሰ እቱ። አሰክ ሓምድ ኖሱ። “እንተ አመት መናበረትክ ምን ትወዴ ለሐይሰኪ። ዲብ ሸቅልን ለተአቱ አላብኩ። ምን ሐበርት ሓለትን እግል እንግሊዝ ትጅመል። ዲብ ኢክሰክ ምን ኢተአቱ ለሐይሰ” እት ልብል ነሰሐዩ ወሐዝረዩ። ሀቱ ላኪን ሰሚዕ አበ። ሐቅ እለ እት ቤቱ እንዴ መጽአው አሰረወ ከጌሰው እቡ። ወክም ትሰእለው ክሉ ለውዳዩ አምነ እቡ። ወእግል ልትሰዩፍ/ ሞት ትፈረደ። መሐመድ ጅጉር እግል ልምሐኩ ወልጠሉቁመ ኢተሐሰበዮም። ሐቱ ሰላት እግል ትሰመሕ እሉ ሌጠ ጠልቡ። አመቅረብ ቅሩብ ሰበት ዐለት አመቅረቡ እግል ልትሰሌ ሰምሐው እሉ። ደአም ለሰላቱ ክላሰት አቡት። ጸብራ ክም ፊመት እቶም ሰላት ገድም ታመት ሀሌት ከፊክ ቤለው ወትቀተለ።

ሓምድ እለ ጅጉር ዘፍን ኒዴ እሉ። አነ መሰንቀዩ እት እዘብዋ እግል ኢብል እኩም ወእንቱም ትከብቶ ቤለዮም። እሰታዝ መሐመድ ሰዒድ ለቀነ እት 1987 ምን ፋንኮ ለልትበሀል አብ በዐል ማርዮ ጸላም ራክብ ነብር ዐለ ወለሸዕር ክታብ ሓምድ ዐዋቱ ምን 1915 አሰክ 1962 ለከትብ ሙናድል ሀይሌ ወልዱ።



ጅግራታት ርዕደት ጅብሀት ምግብ ተ'መ

ሳሕፊ፡ አሚር ዐሊ ምስውር፡ አብርሃም በዩኔ

“ርዕደት፡ ደማነት መጋብሀት ወግጦር” ሐንቴላ ትብል ስቅራት እግል 12ይት ደሉ ገብእ ለዐለ ወራታት ርዕደት ጅብሀት ምግብ፡ ለሐልፊት ሰንበት ንኢሽ 31 ኦገስት እት መዲነት ደቀምሐሬ ተ'መ።

እሊ እት የም 28 ማዮ እንዴ አንብተ እግል ዝያድ ሰለስ ወራሕ ለገብእ ጅግራታት፡ እት ፍንጌ 17 ፍራቅ ውላድ ወአዋልድ እብ ዓመት 34 ፊሪቅ ለዐለው ዲቡ እት ገብእ፡ ሰማን መጃል ርዕደት በሀለት ኮረት እግር፡ ሾሊቦል፡ ባስኬት ቦል፡ አትሌቲክስ፡ ተንሺን ሰለሕ፡ ብድረ ዐጃላት፡ ባድሚንቶን ወቼዝ እቡቱ እት መዲነት መንደራሪ ለአንበተ።

እት ምዕል ካቲመ፡ እት መዲነት መንደራሪ ምን ዐለ ፍራቅ ኮበሪት እግር ዘረ ምስል ጽንዓት፡ ትልህየ ካስ ወደው። እሊ እግል ዕርፍ እምበል አግዋል ለፊግሪ ፍራቅ፡ እት ካልኣይ ሾት ፊሪቅ ዘረ፡ እብ ሐበን መሐመድ እት 55 ደቂቀት ሚርሒት ለአጽበጠዮም ጎል ሰጃለው። ምናተ፡ ፊሪቅ ጽንዓትመ እት 65 ደቂቀት ሙኽታር ሓምድ እብ አተዩ እሎም ጎል ተዓደለው። ትልህየ አስክ 90 ደቂቅ 1-1 አተላሌት።

ሐቀ እሊ፡ እት ሪጎሌታት ለትዐደው ፍራቅ ዘረ ወጽንዐት፡ ፊሪቅ ዘረ ተዐወተ ከፈግረ። ጽንዓት ወደባል ህይ ደርቡ ካልኣይ ወሳሳይ ደረጃት ትረተበው።

እምበል እሊመ ሳምሶም ተኽሉ ምን ፊሪቅ የበል እብ ሴዕ ጎል ለሌሰ መሰጃላይ አግዋል፡ ናሆም ቲድሮስ ምን ፊሪቅ ጽንዓት ለሌሰ ሓርሱ፡ መርዋን ዑመር ምን ዘረ ህይ፡ ለሌሰ መተልህያይ እንዴ ትበሀለው ጀዋእዝ ነስአው።

እት ናይ አዋልድ ኮበሪት እግር፡

የበል እግል ኪሎማ እንዴ ቀልበዩ አወላይት እት ልትነሰራ፡ ፊሪቅ ብሪጎን ህይ ሳልሳይ ፈግረ። መተልህያይት ፊሪቅ የበል ብሪጎት ክብሮም እብ 13 ጎል ለሌሰት መሰጃላይት አግዋል፡ ምን ብሪጎን የርዳኖስ የማይ ለሌሰት ሓርሱ፡ ወርዳስ ትኩእ ምን ኪሎማ ለሌሰት መተልህያይት እንዴ ትበሀለዩ ጀዋእዝ ነስአው።

እት ብዕድ አጅናስ ጅግራታት ርዕደት ምን እንረኤ፡ እት ጅግረ ቼዝ አዋልድ አወላይ ፊሪቅ ነቅፊ፡ ካልኣይ ደምሐና፡ ወሳሳይ እምባሶይራ እንዴ ገብአው አትመመው። እብ ውላድ ህይ ፍራቅ መረብ፡ ህላል ወዘረ እብ ተርቲብ ደርብ ሕድ ተዐወተው።

እት ባድሚንቶን እብ አፍራድ ምን አዋልድ ፊሪቅ ኪሎማ፡ ህላል ወንቅፊ፡ ምን ውላድ ህይ ነቅፊ፡ መረብ ወኪሎማ ነስአው።

እት አትሌቲክስ እብ አዋልድ፡ ፊሪቅ ጽንዓት አወላይ እት ልትዐወት፡ ደርቡ ኪሎማ ወህምቦል ነስአው። እብ ውላድ ህይ ፊሪቅ ነቅፊ፡ የበል ወብሪጎን ደርብ ሕድ ትረተበው።

እት ተንሺን ሰለሕ፡ ደምሐና፡



ፊሪቅ ኩ/እግር ዘረ

ጽንዓት ወህላል እብ አዋልድ እት ልትዐወት፡ ኪሎማ፡ ደንደን ወዘረ ህይ እብ ውላድ ለሰልፋዮም ሰለስ ፊሪቅ ቶም። እብ ኩረት ሰለት ምን አዋልድ፡ መርኩብና፡ ነቅፊ ወመርሃዎ፡ እብ ውላድ ህይ ነቅፊ፡ መረብ ወመርኩብና ሰልፋዮም ሰለስ ፍራቅ ገብአው ከትዐወተው።

እብ ሾሊቦል፡ ኪሎማ፡ ህላል ወደባል እብ አዋልድ ለሰለስ ሰልፋዮም ፍራቅ እት ገብኤ፡ እብ

ውላድ ህይ፡ ማይ-ጸብራ፡ ኪሎማ ወደባል ተዐወተው።

እምበልሁመ ፊሪቅ አዳል ናይ አደብ ካስ ዐቢ እት ነስኤ፡ ፊሪቅ ኪሎማ እት ኩሉ አጅናስ ጅግረ ርዕደት እብ አክላለዩን 32 ንቅጠት ሀርመ ናይ እሊ ሰነት ጅግራታት እንዴ ገብኤ፡ ካስ ዐቢ ወ10 አልፍ ነቅፊ ተህየቡ።

እት ሐልፊ አውካድ፡ ኮበሪት እግር፡ ሾሊቦል፡ አትሌቲክስ ወተንሺን ሌጠ እትሊ ጅግራታት ዐለ። የም ዓመት ላኪን፡ አርበዕ ሐዲስ መጃላት ርዕደት በሀለት ባድሚንቶን፡ ቼዝ፡ ብድረ ዐጃላት ወባስኬትቦል ለወሰክ ጅግራታት ጅብሀት ምግብ፡ ለመጃላት ርዕደት እት ሰማን ትወቀለ። ዐደድ ፍራቅመ ሰለስ እንዴ ወሰክ 17 ገብኤ።

እትሊ ለትወሰክ መጃላት ርዕደት፡ እት መሻርኩት ወሚዛን ፍራቅ እግል ልሰዴ እንዴ ትበሀሉ፡ እብ ሾሊቦል 29፡ እብ ባድሚንቶን 36 ወእብ ቼዝ 30፡ እብ ዓመት 95 ርዕደት ናይ ሳምን ተእሂል እት መጃላት ርዕደትም ነስአው።

እዳሪት መዳይን ደቀምሐሬ ወመንደራሪ ደርብ መዲነት ከረን እንዴ ተለዩ፡ እሊ ጅግራታት ርዕደት እብ ሰኔ እግል ልታመም እብ አርአወ ክድመት ውጅህት ወመዳሊት ሐምዴ ትወጅቡን። እምበልሁመ ፊተት ርዕደት ላቶም ሰነን እለን መዳይን፡ እሊ ጅግራታት እግል ልግመል ለአርአወ ተእደድ፡ ዝያድት ለዘት ለሀበ ክም ዐለ እቲ ለአሰማው ርዕደትን ለልሽሁዱ ጋር ቲ።

መጃሪት ውጅህት ወመሻሪኩት አንሳትመ እግል ጅግራታት ለነወረ ወሽዑር ፍራቅ እት አዳብ ርዕደት ለዐለመ ዐለ። እብ ፍንቲት መሻሪኩት አንሳት ትዘይድ ክም ህሌት እትሊ ጅግራታት የም ዓመት ለትረክ ዐለ።

ፊሪቅ የበል እብ አዋልድ ህይ፡ እት ኩሉ ናይ ኩረት እግር ትልህያይቲ እንዴ ኢልትቀለብ ለአትመመ። ወመተልህያይቲ ብሪጎት ክብሮም እብ 13 ጎል ለበዝሐ አግዋል ለሰጃለት ክም ተ አመሮት ለአትሐዘ።



ደርብ እግል ዳይናታት ኮበሪት እግር ልትህየብ

ፊደራሽን ኮበሪት እግር ኤሪትሮፕ ምስል ውቁላት መአሰሳት ተዕሊም እንዴ ተዓወኑ፡ ምን 26 አስክ 31 ኦገስት እግል መደርሲን ርዕደት ወሴድዮቶም ተእሂል ካልኣይት ደረጃት ተሕኪም ኩረት እግር ሀበዮም።

እሊ እት ጃምዐት አሰመረ ወሐረት ፊደራሽን ኮበሪት እግር ኤሪትሮፕ እብ አርበዕ መደርሲን ለትህየብ ደርብ አርበዕ አንሳት

ለብእቶም 25 ነፈር ሻረከው ዲቡ። እት ኩልያት እግል ገብእ ጅግራታት ለልሐክም ዳይናታት እብ ዕልማይ ወዘበናይ አግቡይ ምህር እንዴ ተዐንደቀው ደረጃቶም እግል ወቀሎት ለሀደፋ ህይ ዐለ።

ርእሰሊ ፊደራሽን አሰይድ ዳውሎስ ወልዴህይማኖት፡ ለደርብ ተአምርተ ናይሊ ፊደራሽን ኮበሪት እግር እት ኩሊ ወጠን ቅድረት ሸባብ እግል ወቀሎት ወዕቅር

መቅደሪት ርዕደት እግል አፍግሮት ለሀደፋ ክም ቲ እት ወዴሕ፡ ኮበሪት እግር እግል ጠወሮት ክም ቲ አብረህ። መሻርኩት ክእን መስል ደርብ እት ኩልያት ሰልፋ ሰበት ቲ፡ ግሪ እሊ እብ ለሌሰ እግል ልትህየብ ትፋነው።

እሊ ደርብ እት ትመጽእ ሳምን እብ ተእሂል ቲክኒክ ክም ለአተላሌ ዕላቃት ዓመ ናይሊ ፊደራሽን ሐበረ።

እምበል እሊመ፡ ምንተሐት 30 ሰነት እግል ዓማሮም ፊደራል-ዳይናታት፡ ምን የም 28-31 ኦገስት እት አሰመረ ተእሂል ተህየቡ።

ሀደፍሊ 20 ዳይን ለሻረከው ዲቡ ደርብ፡ በቃዕት በደሊ ዳይናታት እግል ጠወሮት እት ገብኤ፡ ምስል እድንያይ መቃዩስ እብ ገይስ አግቡይ እት ሸባብ አሰተሰማር ለሀደፋ ቲ።



ናይ ሰነብት ፍገሪት ኪጋት አርብ

ፕሪመር ሊግ

- አርሰናል 1-1 ብራይተን
- ብራንትፎርድ 3-1 ሳውዛምፕተን
- ኤቨርተን 2-3 ቦርንግሙዝ
- ኢፕሰዊት ታውን 1-2 አሰቶን ሺላ
- ኖቲንግሃም 1-1 ምልሽስ
- ዌስትሃም 1-3 ማንሲቲ
- ቼልሲ 1-1 ክሪስታል-ፓላስ
- ኒውካሰል 2-1 ቶተንጎም
- ማን ሮዩይትድ 0-3 ሊቨርፑል

ሳ'ሊግ



- በርሰሎና 7-0 ርዕደት ሻለደሊድ
- አትሌቲክ ቢልባው 0-1 አትሌቲክ ማድሪድ
- ሴቪያ 0-2 ጂሮና
- ርዕደት ማድሪድ 2-0 ርዕደት ቤትስ

ሰሪ'አ -ኢግልዮ

- ኢንተር-ሚላን 4-0 አታላንት
- ላዘዮ 2-2 ኤሲሚላን
- ናፖሊ 2-1 ፓርመ
- ጃቭንቲስ 0-0 ሮማ



1 ሰብተምበር 1961 መትኦምባት
ግድለ ሰላሕ ሸዑብ ኤረትሮፕ



ዲዛይን - ታላላቅ አብርሃ
ሰወር- አርካይቭ ፈረድ ሰወር